



東詩集

不齋  
示解草

新詩  
獨往篇

鍾伯奇  
陳眉公  
譚友夏  
三先生選

# 葛震甫詩集



尺木

竹編

弄聞

弗客

新註

新綠齋

艷雪編

山茶

索解

琅聲

再吟


獨在篇

筑語

鷓鴣

幽堂集

詩情傳驛使仙夢  
列朝詩集卷一百一十一  
南布政司理問崇禎庚辰年七月十四日



葛震父詩序

北吳范景文撰

向予讀震甫梅花詩神相訂也聞其家震澤蒼翠間  
念何日買一小舫蕩漾烟水至花深處對坐伊人以  
慰平生後在銓曹見選籍震甫名在焉又私念若高  
士何由到此及識之行隊中神采奕奕超然埒表人  
也不負向來摸索心爲甚喜尋授卑符以去浮沈數  
年清啗彌房嘯咏不輟垂橐歸來惟餘詩卷一囊耳  
潞河相聚文酒暢酣經歲又復別去今守留樞則震

甫正携家此地時事孔艱憂心如醉每對震甫未嘗  
不渙然暫釋兩人相慕甚殷踪跡乃多巧值蓋亦天  
幸哉震甫好爲詩余好讀震父詩震甫詩讀不使公讀  
者計知震甫詩莫余若今序其詩遍海內而余不一  
言奚其可余嘗笑文人多事壇坫相高其意莫不欲  
盡易昔人所爲獨雄千古不知矯枉有過指摘適滋  
往者代生數人相繼以起其議如波如吳下之正用  
脩近代之翻玉李後心非先沿爲故事今則各立戶

庭同時並角其議如訟擬古造新入途非一尊吳右  
楚我法堅持彼此紛囂莫辯誰是余觀震甫論詩入  
微顧其口中從不聞減否一人以自位置而一時名  
能詩者指及震甫無不內自屈服然則震甫非唯才  
勝卽其識度去人何止萬里譬之高會羣賢辨難迭  
送中有真人安坐無言靜氣所揖衆義皆墮請閱此  
一坐人就爲優矣今之耆宿並稱陳葛或謂震甫輪  
眉公尚在出山一着雖然詩以窮工亦以遊壯震甫

家昔不貧索米長安故業乃盡而車蹄間關動輒萬里九州竒險足目幾遍向使堅卧故山此味何曾得歷今其詩老而益勝安知不從此進造物與人乎秋何可恒情則也震甫既老于此得失寸心不言自喻于余是語宜有莫逆之笑而余序其詩不特詩是品第存今昔驪聚因緣與稱詩之槩于篇者蓋知震甫詩其傳可必無俟余言且欲後世知余兩人相知獨深有如此也

家震甫洞庭畸人也自幼工詩有十六集行世則其友本寧眉公季重鍾譚諸公爲之叙述余髮未燥卽讀其刻本亦竊有志迺以肯方務舉子業勿遑旁涉及廷對後有館選之後遂就學焉亦未有所弋獲一行作吏鞅掌於車轍馬跡焉然與家震甫相隨甚久古云數學半故當焚香夜告之

餘或杯棬唱稊少借風騷略消俗韻間嘗  
分題鐫燭捉鼻成聲初覺滿志淋漓迨家  
震甫句出頓慙形穢詩有別才匪虛語也  
嗣後余僑居白下家震甫歸洞庭陵谷遷  
流板冊淪夷燼於燐燹而四方來索者填  
委甚至倍直轉購應之有友人曰嘻是奚  
足哉難乎其爲繼也何不謀棗梨而新之

可以不匱且廣厥傳此亦君家塾美事也  
余憮然曰命之矣初意欲再購吳門遺編  
新舊合刻有所去取乃勢不得待亟為脩  
事是役也述舊也非梓新也故序論率遵  
舊本不敢臆寘一喙然家震甫沈酣此術  
者六十餘季諸刻行世已久大方宗工藝  
之軒之亦既詳且盡矣余小子何敢蛇足

正復毋煩類上三毫也

徑逢夏燮明甫謹記

葛子傳

葛子者葛天氏之遺也生於震澤生而靈

異甫就口食輒矢口成韻幼讀書見即了

解及長益肆力于古丘索墳典以暨瑯嬛  
閱笈之文篋勿窺厥奧突然志不在章句  
訓詁謂制舉業僅一時名弗學日惟匡坐  
一室苦吟病心嘔血不已時攜茶具至高



山頂或大樹下盤桓終日又或採竒索幽  
不避險峻投止野人家興盡乃返故不多  
見人上亦不匆得見惟同調者至則需接  
綉縵疊上不知倦下榻聯床積日累月雖  
袍袖相錯而坐無襍賓日傾北海之樽亦  
嘗有所問贈一揮立盡且慷慨好施睦嫻  
任恤故譽日隆上而突或不黔葛子栩栩

也篋中惟圖書詩文藁本久之繁上日汗  
湯爨疊葛子嘗自謂避秦眉公笑曰桃花  
流出何怪漁郎葛子同郭聖僕相視解頤  
故人間世撻着片辨便馥上作優曇香味  
傳寫流布聞者若頻伽音名滿天下於是  
海內第一流入散氣相求嚶鳴鶴和或訂  
雞黍之盟或掉剡溪之雪具區厓谷成蹊

猿鹿日面也與人狎矣紀事紀遊歲時有  
刺皆詩莫不膾炙人口然于鷄一蹠耳嘗  
聞葛癸明言家震甫詩以萬計所存什伯  
之一然從未見若斯之專且薦者毋論食  
息游衍即夢中喃也莫匪此事又述其自  
言三十年而後可以成詩又十季完得一  
古字又十年完得一厚字今六十年老矣

而後可不愧於詩信斯言也葛子之為詩  
豈易也哉不特詩也余竊謂其詩字畫可  
擅三絕海內巨眼或不以吾為溢美噫若  
葛子者誠得壘之上九矣顧有老母在雖  
洗腆不缺彼捧檄而喜動顏色者何人歟  
且葛子之所寓目大江吳越齊魯燕豫間  
每以閔粵滇黔寫渺天際勾克濟具為恨

值所善范質公銓次人羣葛子遂鼓篋觀  
光謁選得閔藩司李職如古供奉禮也  
未幾丁內艱讀禮起復滇南於是以宦遊  
以吏隱躋衡廬汜崑明攬金馬碧雞之勝  
蒐牂牁夜郎之竒而其爲詩益適樸高澹  
閱通博大句可彷彿物矣齋捧至都會范質  
公以司馬中丞填撫潞東禮敦就教詎勿

獲辭當事者議更寘薇垣議借翎藩葛  
子皦然俱不赴其任燮明公成進士往就  
焉相與周旋者最久燮明亦任俠磊砢所  
至敬望蔚起咸藉英上濟美御李識韓應  
接不暇燮明弗厭苦不爲疲也後以時事  
孔艱北山移文秋風萼贈各分飛葛子歸  
老于吳在蒼葭空谷間或言其僊去者或

言其未死者見燹明知正命終于牖下蓋  
嘗讀周禮職方揚州之域有大浸焉規旋  
五百餘里發原崑岷經濟黔出峽豬洞遶  
滙彭蠡三江入吳藪澤合而稽天是為震  
澤太史公曰登姑蘇望五湖蓋巨區云詩  
云維嶽降神生甫及申葛子之生豈偶然  
也哉豈偶然也哉古貌健骨冰玉姿望之  
若僊四子二文學葛子為誰名一龍所稱  
震甫者是也震甫為誰所稱震澤主人者  
是也惟震澤能生震甫惟震甫能有震澤

鑑湖麋史蔣應仔傳

男挺書

自

自

自

自

自

自

序

况詩有伶乞季風仲雅何既弥

近序焉可矣亦序壽亦序也自

壽來之康樂是也康樂祖風若

也苑亦序漫亦序也百漫來之混

的乞也混的祖雅者也柔亦序整

六序也。有執焉。執之。云。魏。一。門。是。也。云。祖  
說。者。也。森。之。化。衆。如。弓。衆。壽。者。是。委  
浪。之。化。如。如。弓。扑。浪。者。枯。執。焉。之。化。峭  
如。弓。峭。執。焉。者。尚。上。怡。學。子。所。以。也。務  
之。鮮。弄。學。子。陶。以。元。白。之。易。率。學。子。云。以  
泥。事。之。璫。鑄。示。已。傷。乎。而。學。子。者。示。新

至。乎。是。示。也。焉。學。子。者。季。力。要。南。星。風  
而。行。取。漢。晚。及。及。胸。卷。也。勃。風。雅。之。矣  
而。之。正。既。見。氣。而。之。周。為。徒。焉。流。獨  
疎。了。信。立。日。同。咀。色。口。味。以。得。或。柔。爪  
者。如。焉。尋。噪。之。是。无。學。子。古。示。你。示。你  
示。化。示。化。示。序。示。序。示。文。而。以。影。似。誰

曰坛宇雖壞忠世安于傳遠世亦  
也乞亦躬告文筆行何必依道魏乞  
宋元果有座位矣予偽卷之唐示為  
人乎以力身為法名以為世皆一  
是三十季來矣乞予示及俗流目不及  
兒世如洞庭為哀又者予向漢乞詩

十也季之陵博及之宛乎可也曰  
向予稱哀又者十季之季先後至  
陵親為予說詩曰乞也某乞宋元  
乞亦躬也乞乞乞宋元乞亦躬存乞  
偽卷之唐偽道魏也乞乞乞乞  
宋元唐謹魏乞乞乎亦自為詩乞乞

自去自存之是况也。是詩也。予示之。入羣噪中。後弗後也。出之必傳也。知是必傳也。予豈意。反舌之日。不鳴。鷓且之。夜矣。之。予也。

麻坡社事。美。侗。從。等。為。先。也。

尺木齋原序

吳江沈懋撰

詩不從三百篇十九首來者。終不可言詩。為其遠於情。而弱於格也。葛震甫少時。即沉酣學古。其詩汪洋超忽。橫心之所欲。橫口之所欲言。靡匪金石其韻。而雲霞其綵者。近復刊落雕績。窅然覃思。神理所至。幾象帝之先。顧不知視陰何沈。謝何如而置之。開元諸名家中。或難甲乙矣。雖然。予何人斯。而評騭震甫詩哉。於震甫詩。則心誠向往之矣。今年秋。始交臂得。



其近什若干首讀之一一祖三百而祧十九誠清廟  
之朱絃玄酒也震甫方與海內名家建旗鼓於中原  
不佞視之無異諸侯孱兵從壁上觀鉅鹿戰矣

尺木齋詩選

震澤葛一龍震甫著

侄孫葛璇 葛瑄

兄葛應乾元甫校

葛璘 葛璟

侄葛逢夏燮明

葛璠 葛瑄

葛遇夏際明

葛球 葛琮

葛達夏贊明全訂

葛瑛 葛琦全輯

澗上

白雲飛澗出林樾挂崩湍觸石互相嚙到湖經幾盤

五月與六月不襦亦不冠來聽一片響高枕松風寒  
懷能始聖僕

忽言萬里別書到黯銷魂歲晚遠來送下車西郭門  
客纜昨已解石頭空有痕五湖還獨往三峽正啼猿

旅病

但得就衾枕所投何暇論壁燈秋焰短隣杵夜聲煩  
徒侶幸堪托寒暄聊與存病魂妻易斷不敢念鄉園  
入木水竹吟

竹深溪水濶風吹白日冷盈盈竹下人自照水中影

山中人

山中有人不見人十年相憶乍相親松根汲水澗花  
落月下掃門霜葉新

舟過惠山不及登寄許裕甫

卧向舟中說前山興可乘片帆從衆住忽已過毘陵  
風順翻愁客泉名也累僧掉頭烟霧起空憶與君登

夢陳幼謙

情人語終夕始覺猶自喜徘徊撫孤衾相去已萬里  
天清絳河滅明星粲何許起坐涼月中露下如秋水  
答王元直落第見懷

落羽江頭客西風不散愁遙傳一尺素正倚半山樓  
歡喜空占鵲聰明亦類鳩妒銷眉自好莫問漢宮秋

山中水次聞笛

遙遙秋水上海人夜吹竹風斷聲不還月明江女哭

謝公墩

風流君不見遺土尚峻嶒歌酒來新妓雲山黯舊陵  
林開江半席花映塔千燈只在都城裏有人還未登

燕子詞

燕子來來何處歲歲還從來處去江南二月三月春  
雙宿雙飛雙語親誰家少婦曉凝粧綺窻見燕春情  
傷郎因燕領封侯遠妾鬢空嗟燕尾長

溇溪對雨

市斷溪聲遠橋迴野色荒吹來數點雨相送一孤航

漲綠平官渡煙黃拂女桑隔花僧共語東去是錢塘  
泊菖上

茗風吹綠雨入暮散如烟且宿此溪上不知誰墓前  
陰松寒鬼火水竹帶魚笪寺廢無鐘磬舟中堪晏眠  
題養浩兄齋中蘭  
幽人多幽情種花黃斗裡花開何葳蕤相對忘爾女  
出門風吹衣香從衣上起

晚次葑山亭

五湖一片氣冥濛接昏曉舴艋散菰蘆神燈出烟島  
穀雨日舟中卽事

風轉溪流逆行舟曲曲盤人烟穀雨日天氣麥秋寒  
擁被看僧坐忘吟覺自寬好山啼鳥外及到已春殘  
舟泊處憶季昌稗孫同覺公凝父

野泊原無定依稀識舊曾店開煙市柳船纜月溪藤  
細雨生春漲殘尊了夜燈往時同泛客誰似一瓢僧  
憶鬯園寄李維節孔凡兄弟

凡水齋詩選  
四  
敲月亭前花月寒  
花開留客到花殘  
曾同太守懽然  
飲燒盡春燈照藥闌  
別時竹筍放烟稍  
箇箇亭亭百尺高  
屋後土墻遮一半  
半將新翠與僧寮

月下觀妓

美人含態月含情  
此夜何須子夜聲  
似水生塵凌步  
步與花分照鬪盈  
盈看將酒後頻驚  
曙來向人邊轉  
妒明不見當時液  
池上至今猶說影  
娥名

湖心亭

湖心青一點  
亭子出孤根  
柳吹蕩晴澱  
草烟生夕昏  
人歸方見月  
舟聚卽成村  
片席鷗光滿  
年年冷醉魂  
夜

尋隱者

山烟含九鳩  
澗路入雙林  
問竹有誰見  
扣門知我尋  
白雲幽意遠  
紅藥春情深  
接手各相慰  
幾年勞此心

別詩

一春無百日百遍醉芳菲春去客俱散家家空掩扉  
帆前有啼鳥未發先催歸情人不柰聽雨淚含朝暉

寄趙凡夫

用晦林初闢移家歲幾徂劬烟安島嶼引瀑注江湖  
俯澗懷神駿綠枝感孝鳥一丘身自置丈室坐堪跌  
貝葉翻將遍蓮花種不枯石苔暮鳥宇山菓入猿租  
偕隱寧忘漢連城已在吳人間雙樹別谷口片雲孤

湖水暮空濶山嵐時有無所思勞倚望蕭颯起秋菰  
有客過訪集飲虎峰

短舟何處泊言訪此丘園粲然顧我笑相携同出門  
林歌豔春雪空翠搖山尊無那石橋畔分燈投遠村

西湖

黛寫殘山帶郭遙鏡浮新水不通潮堤邊縹馬客投  
寺花裏唱歌船過橋紅粉年年化香土春風處處長  
蘭苕湖心亭子湖心月醉與何人度此宵

西湖晚度懷太白山人  
落日徘徊處扁舟浩渺間春將流水去僧對野花閒  
勝地無恒主幽尋每獨還南屏看不斷一碧到孤山

卧

高枕長林下林秋夢不驚蒼苔積已厚黃葉落無聲  
懷閩女用張後之

記得當時別勞勞歲暮人征衫臨霰薄資斧出疆貧  
酒佐江南曲花催薊北春十年通一札宵信嫩爲真

泊赤石磯登雨花臺秋望

磯頭望不極騁目秋雲邊天入長江細城規列岫圓  
早霜新柳色殘照寫茶烟與客遲遲下蘋花亂渚筵  
傷陸不淄

水部栽花處憐君獨掩扉病來春已盡家別死方歸  
蚤譽終爲累窮交信可依梁溪溪上月空照夕鳥飛  
清溪月夜訪程孺文

風定川光滿因知夜有水且維溪上棹來指竹間燈

尺水齋詩選  
沽遠能淹客詩空偶和僧突烟寒欲斷披月剪霜藤

懷斗一

客夜孤吟處如君蕭寺中一燈明滅照閉戶亦生風

城南僧舍送楊去奢還吳

栗葉滿霜地入林山氣寒此中長住客枯寂與僧安  
欲話幾年別難爲今日驩歸舟已相待門外卽長干

然諾行

古人之交交以心一語不出然諾深今人之交交以  
面然諾雖深中易變古人不可作今人難重陳與君  
相見但飲酒酒盡俱爲行路人

過徐日方留贈

草堂在城市寂寞對蕭晨君住未云久我來應已頻  
歌翻生涕淚酒似寄沈淪種柳當高閣迷花失舊津  
野塘三百畝小艇一雙人溯月微波動褰裳白鳥親  
倘然隣可卜何異太湖賓  
上巳日湖上對酒懷謝易之朱國蔚王元直



水鮮魚潑刺風滑鳥綿蠻杯洗花源上帆移柳浪間  
三年三日飲獨醉獨醒還爰憶如雲侶分飛幾處山

晚晴

雲濕飛不起半在湖中天高嶺下殘日青村浮白烟  
草堂孤山別墅弔馮太史先生

爲園埋玉樹亦借給孤名千古白雲意六時清磬  
人間悲後死湖上得先生烟水浮春去歌船空月明  
繫馬相過處湖山半入村垂楊獨無賴飛絮滿空園

對面不得語欲歸難出門安能廬竹下風雨共黃昏

澗戶詩爲金伯獻題

小構能容自擁書仍弄琴澗分山一半泉落樹千尋  
石闔玉聲碎雨霏花氣深清纓不待濯醉卧恐難沈  
言傍龍宮井還連橘社林筆搖飛電繞簾揭斷虹侵  
地可逃秦虐人同老漢陰誰爲飲牛者來契樂魚心

哭楊道行

往事何須問江聲日夜流半生惟一病兩別向孤舟

凡木齋詩選  
明月西來意浮雲北去愁庵中木居士還對石燈幽  
送姚敬承還山葵親

秦淮水枯舟迫行洞庭葉下霜夜明整歸湖上同妻  
子久住天涯有弟兄舊業半荒橙橘少短垣猶在薜  
蘿生寒烟宿草牛眠地慘淡家山風木情

花乳軒

所居惟一淡無目不常醒花乳浮春盃松烟寫月櫃  
何嫌濱寂莫自許味清冷亦有陶然侶相過戴酒星

介孺兄客蕪陰予客白門向有采石磯頭之約  
茲病不能往作五言寄之

爲約竟何之年年九月時言沽采石酒同醉青蓮祠  
秋遠鴈來盡水平霜落遲夕陽江上冷客病報君知  
寄湯使君

倏忽兩年別殷勤三致書却看民命重轉覺吏情疎  
聽政惟留鶴傳餐不廢魚風聲動彭蠡雲氣挹匡廬  
木落空秋望天寒病索居芙蓉照江水言采獨躊躇

比隣

比隣治秋色樊圃不施禁主人好事者一日幾相問  
有酒輒對飲無錢只高論蕭然作重九却愁風雨盡

照鏡

今日看非昨明朝又未知誰將心上事寫出鬢邊絲

寶劍篇

冶山崩涪水決百靈死雙精結白日亭亭貫雪虹陰  
風颯颯吹腥血天生神物有神用報恩報讐然諾重

酒酣拂拭起悲吟照見平生一片心

案頭梅

瓦瓶石几一枝疎冷色晴香浸不枯見說五風三雨  
後林中如雪已全無

元旦孔先生園中作

淡旬湖上雨不作過年陰嫩色開風柳新聲換野禽  
爲驩羨兒女得意語山林五畝居然老春來客又尋

山中偶作

山中春雪霽澗底寒泉響谷口無人行嶺頭明月上  
雨中山寺看梅同楊伯羽金斗一鄭君熙

春山烟雨裏隔水悵微茫到寺方知路臨花卽據牀  
亂吹枝上點散作佛前香僧老有茶癖育泉留客嘗  
林徐朗倩過訪不值

出門多眷戀酒伴與茶僧況乃梅花發前山雪幾層  
君來問踪跡人語或難憑留得禰衡刺看將夜半燈

石上

片石平楚間蒼潔復如浣遊人十數輩布席不得滿  
年年灑餘瀝繡作苔花暖偶坐便終日徘徊白雲遠

梅下待酒不至

山晴花路迷沽酒冒深雪日暮人不還春瓢挂林樾

送卜伯符令昌邑

此別情何已迢迢寄一城就萊親得養因漢邑留名  
風動庭花落潮回海月生晏然百里內公事卽琴聲

懷陳元愷先生

百遍相過處花屏帶竹房無勞問休沐每坐到昏黃  
明月居心淨青山作意長養病親藥裹乞假握蘭香  
雪艇空江上春燈細雨傍送迎俱不及離聚亦何常  
曲誤還誰顧憂來祇自傷未須看畫罨知在朝川莊  
山部范穆其過訪明日渡江暮人不識春曉其林燈  
師近無幽處聊爲閉戶人相尋已日暮明發又江濱  
創旬投誰好逢歡置客貧飲從齋從斷孤負壚頭春

長干寺對雨懷張林宗同郭二賦

出郭雨如塵眼中惟綠新前朝四百寺吾社兩三人  
看竹常留宿聽禽每及晨此時空問訊春去洛橋濱

挽覺公

我欲從師老林深結一龕龕成師已去松月自鬢髮

憶裕甫先生

長公棄我去寒暑互相催淚盡無餘滴空街客夜哀  
青天孤月影曾鑒素帷來不忍舉頭看低頭步幾迴  
寄題孫唯化先生田居

青青湖上山乃在几筵間祇緣一水隔不得數往還  
春鳩促田務村中無晏閒二子秉耒出力食承歡顏

桃花

花豔如濃面相看恐未真年年流水畔斷送薄情人

木末亭

到山山不見住處只孤亭栗蔭雲垂葉松枯石作苓  
疎鐘出澗戶殘景漏江汀冉冉褰裳去烟空鳥路青

夜泛秦淮

古渡懸初月輕橈蕩綠烟歌邀樓上和燈合水中然  
去矣春如許因之夜可憐誰家猶賣酒花裏喚停船

郭聖胎嶺南歸卽有北平之役夜過新居賦此

惜別

雪嶺歸來日烟花入夏初明朝還作客獨夜正懷予  
剝啄驚離夢遲疑認卜居簷牙新挂月巷口不容車  
作計迂踈甚爲懽涕淚餘千金將市駿一饌尚無魚  
達曙愁星散生寒覺露如出門天上路行篋帳中書

綠酒呼燕市青藜借石渠  
彈冠入自老題柱看相如  
湯平甫平孺奉尊大夫還自瑞州志喜二首

使君爲郡滿謳歌歸興濃來奈爾何  
江水澄澄垂橐照却嫌劉寵一錢多

匡家兄弟最相聞持贈峰頭五色雲  
製得春衣拜嘉慶人間萊綵避郎君

張氏隱居爲希明兄作  
老卧空山裏窮交幾箇存  
風吹春草長麋鹿到柴門

懷曹能始先生時聞賁捧將過白門  
臨行不及一盤桓欲往從之蜀道難  
萬里魚書橋畔寄半輪

蟾影峽中看水平灩澦春帆斷雪積  
峨眉夏晝寒聞說星槎還北向此時應過使君灘

抵青溪客舍聞莊靜父已入楚中

聞君昨解維爲我行遲遲半面不相及  
一生空別離渡頭誰喚酒峴首獨看碑  
怨入江雲暮悠悠何處期

送實父弟歸便往嘉定因寄徐女廉龔仲和

風冷夜窻鳴離愁相對生海潮黃歇浦江岬石頭城  
窮遇悲孤調殘秋送獨行舊懽傾倒日不減弟兄情  
寄李孔凡  
去年春去白門裏客舍相逢趣裝矣立馬躊躇能幾  
時柳風騷動征塵起歸來獨卧山中雲雲深絕無人  
語聞不但思君常看竹每於看竹更思君君家修竹  
十餘畝冷碧砭人人欲走垂垂忽綴滿林花別來消  
息平安否回首春風客去年虞卿窮愁君不然

舟次見楊花

點點送春去欲去還依依萍踪猶未定愁見水邊飛

出郭

聽鶯出郭早隔夜語比隣寺裏初生日江頭欲暮春  
剝花低傍水新竹半過人點檢囊中有還堪醉幾巡  
初晴過孔先生園居得泥字

一雨百憂集好山空杖藜偶從樵採去言訪石林棲  
屋角蜘蛛網簷牙燕子泥留懽對新旭不道夕陽西



酬沈子勺先生晚過山居

亭亭殘日下疎籬有客入林人未知薄具不煩中饋  
婦清談應媿寧馨兒風傳遠樹秋鳴早月滿空庭露  
坐時門外烟波三萬頃解維何處寄相思

嚴氏池亭

岸匝烟波上池開葦荻中委蛇一港入特立孤亭空  
舍筏度橫木采菱呼小童壺傾無處買留客對秋風  
九日送客之湘潭

吹帽風初起那堪吹別離纔臨放鷁處已是聽猿時  
楚服裁應短湘山望轉疑歸期指籬落莫比菊花遲  
靈巖山下尋黃二丈不遇

開戶見山如見君渡湖相問不相聞籬邊野水淡秋  
色屋上老鳥啼夕曛鄰人爲說携家去更入青山最  
深處溪寒路狹難獨行短掉空維烏桤樹

別曲

具區橋下水悠悠具區橋邊郎發舟郎舟好載青山

去免使蛾眉相對愁

寶光寺同張子明胡彭舉韓中散郭聖僕賦

落日投山寺蕭然有一僧分燈向古佛對客煮寒冰  
板築虧難蔽花龕宿記曾門前幾株樹猶掛六朝藤  
得山中梅花消息

蒼翠寒山裏踈梅綻幾株及時探未得何夕夢能無  
忽有人如玉遙將信渡湖春才露一點光已奪三株  
雪澗流香冷籬門野影枯隔隣俱絕俗儲酒待歡呼

歸計殘年逼愁心片月孤題詩聊自蔚終不似江都  
觀別者

似欲相從去躊躇還入門臨行不忍見背立拭啼痕  
憶雪

客路晴雖好其如見雪難幾時三尺許數日一冬殘  
牕月黯無色簷風空作寒梅花何處發憔悴別江干  
虎峰蘭若夜別吳居士

酒病乘春入詩篇窮日刪雖云離家好終莫及僧閒

聚會不能數，繾綣於其間。寺門燈照遠，獨下雨中山。

王孟禮雪後過訪

早春春興好，行棹綠川平。借寺看梅住，尋予蹋凍行。  
忘言對終日，把苦勞平生。記別路相半，雪村燈夜明。

東殷叔宅

靈巖山下水，浮春君家對。門楊柳津來，日渡湖移艇。  
子尋君同喚採香人。

將出門寄姚珮長卿張有光周端卿

太湖茫茫春一片，湖上好山愁不見。遠吹嫩草綠光  
濕，橫攪飛花復如霰。山南故人知未知，此時已是出  
門時。春將過半浪相約，及至出門空寄詩。

知門懷養浩介孺二兄

回首邀歡日，依依入夢幽。百壺花底散，片偈竹間留。  
月晦轉相憶，春明還獨愁。夕帆烟處沒，芳草遍長洲。

文對花朝行

春到花朝花滿烟，烟花催發渡湖船。行人欲渡且回。

首送客路歌仍勸酒酒酣似覺別離輕醒却復牽兒  
女情兒女情怨春好好歲歲春從客邊老

春日行

舍北舍南風雨散青天無雲叫春鶴閉門一月酒中  
眠門外離帆疊江岸江頭春水綠深深岸上春山半  
出林誰家芳草不傷目誰家楊柳不傷心傷心  
合自傷山迴水繞度橫塘橫塘兒女踏春去日暮無  
人來問郎

送春

花雨盡榆錢落綠酒未臨岐紅顏不如昨鷓鴣一聲  
愁殺人憑誰相送出東郭

夏初溪上送莊靜父之吳

再見已成翁重離感慨同况茲吾郡去未及趨孤蓬  
待渡桃花水舉杯蓮葉風吳王銷夏處只在五湖東

古意

美人在中州躑躅寡其儔桐心結素絲蕙質含清秋

手把珊瑚枝欲贈悲無由盈盈水中月亭亭天上樓

新詩原序

閩中孫昌裔撰

友人郭聖僕從洞庭過茗爲予劇談巖壑烟波之勝  
搜奚囊得詩一帙則山中葛震父所著也游洞庭者  
以不交震父不成游震父之名幾與兩峰並私惟何  
以得此聲人人讀其詩良然不作楓落吳江之恨予  
每歎盛唐諸家最爲人所描畫者無若王孟摩詰禪  
誦輞水浩然棲隱鹿門彼皆烟霞其韻冰雪其心故  
所爲詩清冷曠絕有天際真人想如徒就音調字句

求之所謂王之學華桓之似劉卽事事逼真去之所  
以更遠震父所居當湖山最竒處而聞其名風清氣  
疎神情散朗飄飄然有高霞孤映明月獨舉之標此  
編寥寥雖不足盡震父而亦時見一斑兩斑政如葉  
脫波澄山骨盡露風鬢霧鬢自然蛾眉震父雅未嘗  
顚顚王孟乃世之效曠學走者顧未必如震父之得  
其神闖其室也偶偕聖僕惟秦泚舟黃龍登絕頂望  
太湖銀濤雪浪黏天無際時見飄影黛痕隱現于虛  
無縹緲中大叫竒絕所謂伊人在水一方因出震父  
詩共賞之亟呼子墨草數語以當乘葦且戲語聖僕  
曰食馬不食馬肝不爲不知味予雖未獲游太湖然  
已攬其色雖未識震父然已序其詩亦何必濡足褰  
裳拍肩執袂而後愉情乎聖僕復大笑謂子自爲進  
賢解嘲吾當問之靈威丈人及質震父

新詩

震澤葛一龍震甫著

莆田郭天中聖僕校

秋渡

一水宵無際五湖秋不分  
飲虹懸入望來鴈斷呼羣  
人坐背落日帆飛領孤雲  
已是吳江上蘆中夕語聞

葉燈 有引

霜梧敗葉凡為剝蝕所餘  
輕綃其質矣友人取以

製燈光明洞徹新異創觀同社賦之媿不得其形  
似也

梧涼葉不縮無風亦應墜棄置霜露間陰蟲蝕腴翠  
掇拾乃伊誰創作出新意而以數片秋默與九枝會  
籠燭疑受風光明撒幽閤蜘蛛絲骨空屋蟬蛻遺寒翅  
照我林壑人胸中無芥蒂

題李象先浮家閣

天地浮家者清淮小構宜所臨無不可隨遇若相期  
榭月嫵遲客船花礙壓枝子猷桃葉渡山菡習家池  
往事東流去高情復在茲竹分連宿土柳唱入新詞  
燕雀初飛處蛟龍競渡時牀頭傾甕雪波上卷簾漪  
雨色涼堪把潮痕暗忽移余家五湖裏來此憶鴟夷

曉行

日出已杲杲西月還相照農婦餉晨畊牛衣覆霜草

杜蘭香下嫁張碩

雲海茫茫誰指南風鸞翼翼墮驚駮雙鬟凝綠春烟



擾片玉生香曉露含  
天上有繩難繫足  
山中無草不宜男  
月明人去松花白  
空咽清泉落鏡潭

舟中九日

九日渡頭人迎風倚孤棹  
江空落日遠入夜生餘照  
無菊亦無侶開尊自相勞  
紅葉點鷗波青煙出魚竈

野橋懷郭聖僕

白板斜飛曲岸通  
朱欄照見綠波中  
故人別處猶堪

憶楊柳西邊蓮葉東

訪吳逸人不遇

知君三十年還住  
石城邊投策問隣比  
出門相後先  
空庭半殘葉野爨惟孤烟  
咲指松根石幾時來醉眠

白門逢吳淳仲爲題濠上居

吳郎之居在濠上  
席門正對西南開  
長堤踈柳半塘  
去短堞流雲間  
闔來家藏清閔恣盤礴  
隨意看山復  
登閣卧游不學宗  
少文自有胷中好  
丘壑憶昔訪予  
正月春亭亭梅萼照  
丰神別來忽漫六七載  
一日秦

淮逢故人故人相對問幽居  
雲山烟水近何如我買  
扁舟侵曉發與君濠上達家書

丹灶

石上僊人竈正對煉藥洲  
相距百餘武湖水中悠悠  
水寒烟自起擊石火不滅  
僊人何時來烹雲煮明月

送范東生之滇南

相念亦已苦却於離處逢  
江轂撼獨往客路趨殘冬  
天盡山忽起瘴開雲復重  
館人蠻語接計口給新春

黃雲

垂垂壓秦塞望望極胡天  
落日飛鳥外高秋殘戍邊  
草荒沈一色陣冷滅孤烟  
賦罷山中客因懷湖上田

送雪公之天台

本是吳門人結廬廬山住  
忽寄潮陽書復向天台去  
天台之高不可望赤城瞰海標  
霞光真僧夜誦聲琅琅  
雷轟澗底開龍堂瀑飛濺沫散空霧  
半濕緇衣石梁度石梁東下瞿塘路

錦鳩峰

地絕谿舛外林開碕礪中一螺青入遠半面白涵空  
寺雨聞啼鳥江晴見落楓拂衣斜日影僧梵起墻東

本具病

閒居了無事頗與病相宜卧久客來問門前舟亂維  
藥泉通細脉松雨滴高枝謾說臨秋健涼風不耐吹

西遊湖上

幽侶過湖上持醪餉沙渚對面坐相悅綢繆以爲語

垂楊團若葢濃陰沃如雨隔浦掉頭人扁舟亦來艤

、訓劉師蕃過訪

有客懽呼入山童識舊知相逢還自憶爲別幾經時  
露白酒香早橘黃書到遲僑居隔林巷一過一如期

莫釐峰

莫釐峰高幾許白日溟濛散烟雨襟領崔嵬七十二  
何異桓文蒞邾莒振衣獨立春風生春風揭地波濤  
傾將軍戰骨化爲土湖上青山空殉名

俞仲茅園池飲泛十二韻

爲園非辟疆奉母似河陽別徑通幽墅中林半野塘  
雲山當小閣星渚邈迴廊橋折藤牽纜亭欹葦蔽航  
乍生荷葉小已散柳花香鷗點溪光淨龍腥雨氣涼  
樹間明熠燿城裏泛瀟湘徙目驚殊遇浮家卽醉鄉  
傍花疑待渡擊節和鳴榔岸接重携具更闌且滌觴  
露清聞鶴警光定見魚牀不易三公日留懽一夜長  
知君方送客問寢又登堂

贈杜君潤

清淮夜霜落進艇候潮平幽居在渡口獨樹臨軒楹  
相對若空谷烟雲隨意生予歸感君贈山雪照江行  
葛洪宅

吾家抱朴子以令求丹砂一朝棄民社揮手弄青霞  
山中有廬背高嶺門外烟濤數千頃鷄飛出雲犬吠  
石石立如人瞰虛井井浮丹花迷村移家之圖今尚  
存豈若遼東下令鶴歸來無處訪兒孫

豈懷沈生予先生

舊業吳門外新聲淮水間才非百里用恩許半生閒  
聽雨夜對看花春不還別來無一信凝睇每登山

樓頭月

滿月不易上忽在高樓西光動瓦霜白影臨簷樹低  
脉脉轉相向盈盈如可携關山客萬里夢斷烏驚栖  
舜五過別酌酒蕉下題葉送之

數葉蔽軒楹照人如水明憐君好肌骨不以坐來清  
滴露石常沐無風秋預生巷苔移返景一碧送將行

縹緲峰

五湖一勺水涵毓皆名山龍翔鳳翥曷勝數唯是縹  
渺特立難躋攀莫釐據其東對拂雙烟鬟兩山之靈  
伯與仲日跨飛虹相往還下有空洞不測禹時穴玉  
書金檢藏其間靈氣秀結芙蓉斑千盤百磴攀空上  
曜靈倒掛藤蘿閒側身倚石壁揮手排天關茫茫人  
世在何處恍忽渾沌未始開荆蠻

哭孫唯化先生

平生不善病垂老更加餐未果山南住聊遺隴上安  
信來青墓草人去白衣冠渡口空津筏詩中失考槃  
貧應堪殉死慟莫及憑棺骨冷誰收駿殼秋憶嘯鸞  
水邨浮黯淡雲岫隔瀾漫甌或萊蕪後盤猶苜蓿殘  
及門從此散岐路已無端

舟夜懷張叔弢

短晷促行路向晦無晏閒水寒乘霧起空響觸雲還  
搖漾櫂前月微茫城外山使君爲郡夫誰念客江關  
泊京口懷鄭翰卿

同在客邊無處問却臨江水寄江聲寺前潮落鐘催  
渡城下帆收鼓報晴歸去猶存三畝宅別來唯見半  
生行秦淮烟月留君住莫徇當年蕩子名

郭伏生訪山中晚眺壇上

曷景下遠水荒壇散餘輝山羽若相接野帆猶自飛  
漸濃蒼翠色已冷薜蘿衣豈唯初到客予亦轉依依

范蠡宅

越人已雪會稽耻吳國佳人盡從死西施獨趁五湖  
舟少伯功名付流水湖心浮黛出雲端縹緲曾於石  
室看卜築應先變名姓往來無復舊衣冠衣冠黯淡  
好丰骨名姓雖殊有人識寂寞丘墟亂石間猶得相  
傳范家宅此公踪跡厥匏瓜幾處雲山幾處家他日  
還聞相齊去年年空老宅前花

至後二日孔先生伯仲張希明蔣昌過晚香亭

看餅梅

正覺閉關寂忽焉來故人迎暄坐相昵別遠情逾親  
花枝動山雪餅水儲江春日共亭下酌殘冬還幾旬  
靈源寺雨宿可南上人房

山中有此寺今爲乍來客入林風雨生未夕已昏黑  
佛光能照人僧面半予識一夜坐相看松泉響空壁  
得海陽謝易之病中書

會面轉難卜年年離夢孤書從行脚至病以半身枯

海日無多路，蠻天盡一隅。不須猿噉噉，清淚易成。

龍女祠

黛綠鬢鬢烟霧鬢，月明何處弄珠還。桐花落盡閒門

掩空對徐侯，一片山

雪夜懷沈子勺先生

雨止雪方受，須臾没人脛。夜半開門出，抱甕汲冰井。  
四顧何寂寥，山空樹無影。有懷將語誰，破月上高嶺。  
雨宿永福山房喜陳懋功至

歲杪百爲集，偶逃山寺中。不分朝與莫，相對雨和風。  
吾友郡城到，蕭條情況同。清談竟一夕，燈黯石牀空。

哭吳健甫

嗟君急予會，唯恐有今日。今日詣君前，一語不能出。  
浮生果胡爲，雲烟散飄忽。願持明月心，耿耿照幽骨。  
臘八日雪始集清壘社

數子盡余好，邀懽如乍逢。社開當蜡飲，花散自晨鐘。  
石岸冰膠楫，山厨飯屑松。願言此期會，頭白以相從。



飯石峰

山僧咒食峰頭坐山下衆生皆不餓灑飯諸空雨爲  
石至今粒粒猶堪數峰頭高並雪山看試問山僧已  
涅槃飯顆先生老無恙相逢此地說加餐

吳凝父唯一齋成寄題

葺茆臨港水路折橋之東時有式問者而無應門童  
雲寒積卧內風夜如舟中飲矣更何事此心予或同

寒園

玄冬淡陰沍霜風摧灌莽寓目鮮幽翳一畝亦云廣  
日出茆簷間雲生泥壁上偃仰足昕夕親朋息來往  
空林如有人互荅芥冰響

雨

春來將一旬雨止無半宿白日擁衾卧將迎屢違俗  
溪壑已知厭郊園一迴綠慚負梅花心牀頭酒空蓄  
喜聖僕至

爲約每無憑今宵喜得朋片雲波上宅殘雨夢中燈

春冷花如病齋清客當僧看山不待霽把臂入烟層  
聞舜五歸往訊已行

爲別雖未遠無時無念君及歸余不見行矣始相聞  
往訊信何益躊躇下斜曛松風蒼人語聊以慰殷勤

煉藥洲

波間一席地漂泊如枯槎浮烟釋蛟水卧石爭鷗沙  
前山綠片片飛出雲中花欲問僊人居僊人久移家

月夜虎噬石上苔凝爨明生諸衲見遲

明月出遠水光動梅花間懸崖莫廣石可數莓錢斑  
緇素四五人盤遨意閒閒相期忽相失余到唯空山  
絕頂無風聲松陰寫潺湲寓目百里外嘯坐以怡顏  
始爲居後歎終喜得遲還

聖僕宿永福寺同賦空字

蕭然何所有瓢笠與青童住可爲山長來先問石公  
梅遲若待客松嫩已知風一宿東林社花龕對雨空  
梅下送君畿

去年君未歸梅花爲君折今日花間眠那知有離別  
深林欲雪寒垂雲酒醜入手生微醺花香滿船送君  
去重到看花重憶君

送楊伯羽之六峰兼寄孫伯觀

薄游曾未慣迢遞涉風湍津柳吹新碧依依誰耐看  
江魚阿母嗜苜蓿先生餐好借殘編照東家雪正寒

蝦蟇嶺

山勢互向背中嶺自橫絕鱗次山下居居人阻難越  
相去不數里動煩五湖楫何年此開鑿磴道幾千折  
一折十餘武一武一回歇行者固知險其如徑趨捷  
予昔何矯健褰裳去超忽今來筋力苦仰止戒傾轍  
春雲壓松頂蒸蒸氣堪躡臨巔忽復坦晴景水西揭

酒家桃花

桃花村中花已無一株開傍吳姬壚喚郎下馬看花  
去花下有酒任郎沽

春游阻雨山寺同聖僕伯傳得晴字

客舟元載雨只說到時晴安得杖藜出空聞鐘鼓鳴  
香沈花晝冷簷湊石泉傾爨濕烟相鬱雲驅山欲行  
雖然似寒食猶喜未清明

合掌石

僊人謝拍肩戲佛幾何年願喫夾山棒不受秦王鞭

送周端卿

草烟浮綠漲浮藍春釀離愁客未諳樹杪疊帆風過  
五水邊脩禊日逢三花迷海燕遲歸信酒濕山衣和

滴嵐相送莫教頻顧曲落梅早已怨江南

葑山亭戲呈郭二

孤亭出窅靄洪流在其下落日倒空影憑闌轉生怕  
主人飲忽醉微風一帆挂莫笑我先歸竒觀在中夜  
賦得春水綠波送別

春將渡江北雨未足江南灑灑新愁動老差遠思含  
爲君持此曲歌向百花潭

寄錢叔達

向時肝膽盡曾復共誰言芳草忽滿地春風吹幾番  
佛前身易捨難後業無根茗水碧相望空招離別魂

海眼

靈泉溢雙竅洎洎應潮汐一從渾沌鑿至今人莫測

當壚曲

臨卽酒香花氣和壚頭鶯語春風多遠山着黛脂凝  
膚調笑希鞵滌器奴十千不滿那箇沾

晚香亭筆燈看餅中杏花同聖僕伯傳得扶字  
不教風雨妒尋貯野亭孤放早疑催燕含暄可當妹  
艷將烟暈助根借水神扶看處人俱醉村中酒易沾

五浮

誰着烟空青五點狂瀾東下何曾轉奎躔歷歷應浮  
沈河漢遙遙帶清淺山祇舊是匡廬翁幾年來借馮  
夷宮落日中流棹歌起春風一片桃花紅

客有約看角里梨花予不得與賦此寄懷

海客迷花渡何如剡曲行樹頭高浪蹴雪裡亂山晴

素艷吹烟濕春魂冷月明舊家來白燕新調叶鷓鴣  
迤邐翻龍渚參差帶鹿城千林空鼎鼎一望阻盈盈  
寂掩荆扉卧愁添片雨聲

五女墳

君不見五女墳墳頭蒿艾俱蘭芬父死不能以身代  
一齊殉骨西山雲山雲結不散千秋翳殘燠居氓感  
激重生女緹縈有姊安足云江之娥湘之君往來環  
珮聲相聞吁嗟丈夫鬚眉豈易得却使湖山靈氣鐘

釵帚

送聖僕遊西洞庭

酒船西渡客微醺碧雨初收長縠紋到岸拂衣先拜  
石登峰投策易乘雲林巖曲度懷商皓洞壑燈燒辨  
禹文海日湧濤將夜半嶺花填雪過春分露芽暖茁  
嘗新薜水葉香生摘短芹舍館還尋勾漏宅山靈解  
識武夷君烟波渺渺愁予望康鹿悠悠媿爾羣飛夢  
十年今獨往幽深窮得幾朝曠

柳毅井

山根一泓碧中有龍君居柳生落第客傳得涇陽書  
事去井還在徘徊空照影不見風鬟人居人亂垂綆

雨夜喜施正甫再宿山齋限韻

織織雨絲長簷花細細香山含沈水霧月滲隔雲光  
昨喜占燈綵前期締橘黃石牀寒不寐酣對兩眉蒼

索解集原序

雲間陳繼儒撰

余所遇畸人二曰吳孺子曰郭聖僕二君皆好奇癖  
山水孺子所携多木瘦几杖聖僕長齋二十餘年以  
舊玉古研秦漢篆隸碑葛震父詩自隨震父家洞庭  
孤吟獨賞影不出山聖僕乘小舸犯風濤求之留輒  
累月靜嘿叫嘯樵牧吁駭不識爲何如人聖僕曰吾  
每笑彌生懷刺不若井大春未嘗修刺侯客震父曰  
然則汝何以過我聖僕曰吾甚憐汝詩耳震父詩以

陶韋王孟爲宗如空中清谷中響無可擬議惟孫真人之嘯倪處士之畫庶足以當之負時調者非惟不能作亦不能解也卽更有解者震父亦不復索索一聖僕足矣震父曰吾詩爲聖僕初刻之茗上再刻之吳闡正如避秦人爲漁郎徧傳人間不無小恨陳子曰君當怨桃花流出不當怨漁郎饒舌也聖僕曰善子爲題數語以謝震父

索解草

震澤葛一龍震甫著

都人潘士彥仲美校

銷夏灣

衆山胡蜿蜒迴合空其腹片水從中滙陰森翳叢木  
雲痕抱石凍曦影沉煙綠五湖分一頃四序缺三伏  
君王昔游止冰壺沁寒玉迎風揭飛構裁波製輕縠  
翠華去不返漁舟暮來宿往事成偶談猶然凜肌粟



新柳月

芳柳新開凍斜懸月半規流黃一意照盡染麴塵絲  
奩畔索春緒樓頭惜夜離楚腰爭估寵莫遣素娥知

過周公瑕園林

綠逕接紅橋橋迴逕轉遙衆香吹復聚百舌語相調  
人去空江左花開憶小喬石樓春不蔽山翠隔城邀

悟道泉

泠泠下石雲滴瀝芙蓉蕊山人不出山但飲山中水

清明日百花洲送聖僕

寒食寒猶在新煙拂柳斜城中應罷市水上遍開  
花生聚且爲樂遠離寧弗嗟空洲春寂莫芳草送浮家

舟中觀妓送客

美春川上女載雨花間船最是多情處猶爲未別前  
並頭雙玉嫩半面一生緣歌罷愁無那江空路入烟

林屋洞

大禹定水土藏書決鴻濛一竅入地肺上與天門通

懸壁互撐壓錯翠皆芙蓉白鴉恠人語亂撲如蠛蠓  
始行二三里偃僂屈予躬前往漸開暢高宇復深宮  
石牀聊一憇石確有餘春神鉅時或鳴聲在波濤中  
握炬屢更燎幽閔詎可窮亟返顧徒侶一一失所從  
靈威乃何人後先不相逢造花戒宜洩願以泥丸封

送疑父之白下予將游武林

我向西陵去君先向秣陵草衣黏薄絮臺笠挂枯藤  
野水花間渡香臺雨後登游人不到處一問六朝僧

游絲曲

柔風暖拂游絲起弄影輝輝駒隙裏亂將花片逆蜂  
媒細逐萍踪散魚餌萍長花摧春未知青天無處不  
絲絲若教繫日扶桑外轉覺如年白晝遲晝遲閨闈  
酣春困潛向佳人換嬌髻歲歲愁添明鏡中玉臺塵  
掩愁難近萬里飄飄蕩子身一絲牽斷故園春憑誰  
爲染啼鵲血擲與當時月下人

桃花源

一澗入蒼烟千花繞澗邊  
花開與花落流水送流年

雨中懷愚公

十日九日雨乍晴還早霞  
出門多水宿寄食半漁家  
津樹低浮鷁城雲若聚鴉  
思君不一見開盡山中花

雨店

作客轉愁春春殘愁殺人  
山村惟一店風雨以爲隣  
馬病空知路裝泥自煬薪  
殷雷行麥甸雒雉當司晨

送春

憶昨喜相見林深來較遲  
三旬當季月今別又何之  
雨綴薔薇刺風牽楊柳絲  
不知風雨意可得阻臨歧

西子塢

挾貌自無倫呈身却爲人  
還憐太湖水曾渡苧蘿春  
舊國存亡後新權寂寞濱  
前山拭烟黛學得向時顰

茅山作

入夏息游鶩幽探任獨往  
野燹交暢木流泉蒼空響  
旭生積雨後綠泛重雲上  
叩首睇高峰懸崖突相抗

臨巔俯曠野砢礧疊波浪千里一披豁二氣互升降  
日月闕金宮風雷肅羽仗十載九登涉筋力漸非曩  
靈異遘何時兀兀坐惆悵

聞范穆其已到白門不及一會

游興一何邁遠書誰與傳送客易水上擁姬秦淮邊  
相訊乃如此所聞猶不然別懷芳草亂獨下五湖船

角里

雖非秦人虐漢高一何倨雖非不死藥紫芝聊可茹  
留去了無心孤雲識其處

懷澹如

山居五月盡涼冷如深秋况兼風雨聲颯颯來高樓  
樓高下無垠綠滿蘼蕪洲美人望不遠一水東南流  
水流何時還相思日悠悠

雨中問姚長卿病

屢向山中問獨眠江上春歸來榆燧改還與藥王親  
日氣鬱爲雨午晴難及申相憐不易見同病乃何人

練瀆  
陣雨陣雲空作陰  
水犀應散五湖深  
斜陽不改當年照  
照見波間臥綠沈

擬王仲宣懷德

亂象彌中原  
白日橫氛霧  
冀闕蕩爲墟  
秦川阻難溯  
漂泊離本根  
躑躅委行路  
水鶴知天風  
候蟲響昏暮  
客子懷百憂  
涕下忽如澍  
窺身日已遠  
詎謂澄清遇  
神武開鴻基  
六合擴其度  
駕出鄴都城  
葢拂漳河樹  
從待宴游樂  
嘉禮稱異數  
慚類孤生蓬  
流轉非一處  
感私結中腸  
金石豈逾固  
榮名自有實  
昭垂竹與素

過適適圃

人烟移茂苑  
山水拓平泉  
只費游盤日  
何論卜築年  
曜靈棲海樹  
雲氣鬱峰蓮  
懸級臨飛構  
憑虛俯大川  
未晴先報鵲  
寂晝始聞蟬  
空洞渾難測  
谿衍復在前  
迴飈傳谷響  
高溜激松絃  
露冷漁歸寢  
溪殘鶴待船  
引槎支斷壁  
栽竦曳長煙  
緝譜煩花史  
圍棋隱橘仙

藤稍穿屋裏筠籜解牀邊望遠如相失竒窮返自然  
棘扉通別圃芝石供枯禪禮數園林藟過從刺不傳  
鷄山

吳王養鷄如養士絳幘峩峩金以距一時鬪氣蓋鄰  
敵築城半入蛟龍窟至今湖上立空名但見殘山不  
見城驅鷄入雲乃誰氏結廬猶傍山中樹

孫子長先生敘予新詩賦此寄酬

所思茗水上獨在太湖西未接中郎屣手傳勿婦題

芙蓉新結佩桃李暗藏蹊渺渺情何及月明空自攜

雙鶴

兩兩雲中禽來自東海隅特立向人羣允非耳目娛  
皎潔恒自好亦豈易爲污飛聲曉空裂寓目秋雲孤  
曰予山澤癯骨立真與俱他時舉修翮導以游清都  
將軍墓  
莫釐峰下故將軍戰骨蕭蕭瘞白雲大樹不凋前代  
葉垂陰連葢幾家墳

避暑虎峰蘭若

朱櫺通浩渺碧殿倚嶙峋  
暝雨過龍陣陰霆護法輪  
禪叅放午寂佛骨砭寒新  
却笑同來者長齋是酒人  
日下觀白蓮  
寂寞銀塘窈窕灣  
月明花淨夜閒閒  
何人解佩遙難贈  
幾處踏歌空自還  
幽意不勝涼冷後  
澹然相照有無間  
波光渺渺行堪溯  
擧採年年損玉顏

莫釐渡

岸勢奔欲赴山根忽如割  
東西各萬頃於此控喉舌  
海風一日起驅水下江浙  
旣晚客歸盡鐘聲度輕楫

賦得皎皎河漢女

榆檠千花綴天長一帶分  
織成機上素演漾波間文  
無語竟誰待結思空自殷  
人間飛片葉消息幸相聞  
陰城湖雨泛爲許元燮贈美人白眉  
青似不  
煙橈蕩轉城湖北湖水生  
陰雨光白水上娉婷弄影  
人花前婉變鍾情客幽意  
相看不自持若眠初起病

心時微風飄拂蕙蘭晚冷月照出梨花枝薌澤襲人  
人欲醉酒政寬儂默相會輕綃霧捲衣若無鬆髻風  
吹綠將墜小字稱來昔最良白眉今屬校書郎不勝  
弱腕堪支枕豈但新聲能斷腸腸斷應須五絲續枕  
支詎此雙鴛玉迴舟雨散風氣寒葭菼蕭蕭何處宿

懷范東生

南雲一萬里別路正悠悠聞道青陽節纔登黃鶴樓  
望鄉應見馬去地更無舟物色窮荒服炎蒸入素秋  
新聲聊自和敝刺向誰投瘴樹愁相鬱寒星覺易周  
因過茂苑問一月酒人游未有歸來信瞻烏屋上頭

石壁

半壁入湖如削成北來山勢截雲平漁舟夜夜泊其  
下貪看落日波間明

病中喜張有光訪

習懶既成性微躬易爲勞寒暑遞相運偶予失維調  
一卧踰三旬以藥代飲醪忽來平生友復攜方外交



味且至晷昃晤對如繫匏于時積雨散幽鳥鳴園條  
會意非一端暢焉舒鬱陶

謁徐迪功祠

哲人不可作遺貌若平生落落存風雅蕭蕭起樹聲  
井來窮巷汲碑作斷橋橫斜日躊躇下空傷蘿薜情  
玄墓山寺同黃伯傳孫子真作

閣面浮湖出松根見日斜向會思結夏初到已如家  
石立披月宸藻鐘銘盡法華緣知鄧尉勝不獨是梅

花

聞實父弟爲漁海上寄訊

見說爲漁東海頭水天無際一孤舟網收慣趁落潮  
夜酒醒不堪明月愁樓船將軍有高况坐索題詩致  
龍藏須臾風定濤色開綺錯樓臺出煙上

仙人石

何來石上雨但見履綦濕青膚日夜長千年不能沒  
七月十四夜同伯傳子真虎山橋看月三首

孤塔刺平川飛梁亘遠天秋剛三宿到月借十分圓  
况有會心客偕來維酒船四山青翠斷爽氣散如烟  
獨艤無人處高涼浸月規水明雙崦合山缺半虹垂  
嘯遠秋相激情生夜忽移徘徊空影照風露滿鬚眉  
宛然一水上對面皆青山儲酒行盡挈拍浮當此間  
不知零露下但見孤雲還漁舟滿載月散泊藕花灣

明月灣

巖壑爭驅曲曲盤水西猶掛一重巒不知明月他山  
照只合孤舟此夜看宮廢玉沈無暑氣樓開珠躍動  
波瀾游人莫漫乘秋興葭菼生愁未易殘

錦帆涇上逢聖僕伯傳夜酌聽歌得燈字

此水經行慣因君感舊稱夕帆收片影秋響動荒塍  
不遠垂楊市誰家細雨燈相看有姦變歌向酒間徵  
憶昔行寄王元直

憶昔別君君別予君方白晷未有鬚臨風顧盼動光  
采任意揮霍皆靈珠湖海茫茫不相見見書豈得如

君面一失交權十三載別黜屢遭名不賤人事參差  
詎可量白門同舍有徐郎徐郎墓木今已拱一劍未  
酬空斷腸西風昨夜吹菰米聞說君將渡湖水水上  
柴門日夜開帆陰直到柴門裏

### 錢堆山

山盤若聚縉秋氣鑠烟紫中有蒼蒨出得非錢樹子  
錢神能羽翼胡爲止於此相對卽西山曾無饑夫死

### 十七夜看月送客

秋懷唯耐酒酒伴惜輕離且共此宵坐月來猶未遲  
綵流呈露葉香散出輪枝好記秦淮上徵歌一棹維

### 懷柳陳父

幽尋屢不見行路忽相接慷慨平生懷欲語反成結  
別向山中臥惟對山中月明月亦何常如環復如玦  
賦得秋鴻送穉孫

颯颯寒意動翩翩征羽邁離離渡鶴關噉噉辭龍塞  
關塞防秋劍戟森橫天殺氣結玄陰雪邊曾送孤臣

宋角草  
日月下還催戍婦砧砧斷何時得授衣目遙難繫帛  
書歸湘江水闊呼羣疾衡陽峰高相背飛飛影帶  
吳楓落回首黃雲暗沙漠客子少年輕渡江渡江始  
信江南樂

青白泉

兩泉同一寺青白各自好  
寒人汲稀寂寂山花照  
可惜

出門卽是客况已渡湖遙可惜  
藤蘿月看人卧寂寥  
水西龍渚石崦上虎山橋  
夢去渾無着秋聲集夜條

夢覺公

既知生是夢轉以夢非真  
一別爲長夜相逢忽又晨  
潭雲滅寒影山月下秋輪  
攬照明光裏空悲有髮人

望湖亭

望湖亭中人望湖望湖人去  
亭亦無荒磯貼水覆長  
蘆寒雨蕭蕭落鴈孤

送沈子勺先生之官嶺南

老成殷 主眷三命下菰蘆離鉞催星使郵籤遞海  
夫性成崇簡淡驂擁戒闈呼頌橘先經楚攜尊共出  
吳帆征秋似馬猿聽夜如烏倚重當關鑰便宜假漢  
符嶺雲連百粵島日挂三珠燕子去時去梅花無處  
無綰情偏在野臨別且傾壺好憶空江上霜楓紅幾  
株

虎丘月夜尋聖僕

自有此明月酒人猶未閒最憐今夜好人盡月初還  
雲陰石上水霜氣寺中山襍被尋君處龕燈照一灣

看菊田家作

城裏秋爲市花船半入官田居人不到只種自家看  
近埭防鷄擾分頭插棘攢阿翁見女共無酒亦成懽

太湖石

陰精結玄冥鬼恠百千狀淪沒洪流間一出甲天壤  
好事疲民力椎鑿元氣喪所存悉神物鈎帶不相放  
驚霆宿幽隙仙雲接高曠昨游九月盡水落石根剩

觀止無吝竒更得陟其上古蘚深一尺垂藤十餘丈  
浚衒翳積土隱隱蓮花相何當盡洗剔高决湖心浪  
送梁元珍還嶺表

闔閭城外樹才見幾朝紅伯通橋畔雨相送一帆東  
家近嶺頭出海寒烟市空劇憐交臂日已是別離中

### 靈源泉

一源何處來却向此中出一畝疲癯起方知是靈物  
梵構自天監泉名已先立山僧廣上善世與人人汲

### 雨中九日賦得遍插茱萸少一人

蕭蕭颯颯動秋菰風雨登臨事有無佳節又來催綠  
酒故人相問隔黃壚氣昏山閣僧鐘冷影斷江門客  
雁孤滿著茱萸不堪把只看霜色上頭顱

### 十日莫釐峰會集

岩巖峰路出叢林濕氣猶含橘柚深自許幽期移節  
序那知絕頂異晴陰茱萸短鬢看如昨風雨高吟擬  
到今天浸五湖空蠡宅地傾三郡砥鰲簪波間葉下

聲相觸石面雲生席半侵望去轉憐無處斷老來消  
得幾迴臨全收返照秋光淨忽送輕寒酒力任緇素  
兩忘聊一笑飲中誰不是齋心

夜

未黑月先到閉門秋在家亭亭壁上影種種籬間花  
李長蘅將之武林見訪吳門客舍同過半塘賦

此爲別

面對不相識許心幾何年共此脫粟飯赴君西郭船  
秋殘半塘上日落臯橋邊無能淹適越還向酒壚眠

訪王德操隱居

得共曾來者移舟逕到門短籬分確舍幽築亂雲根  
晚食禽雙下秋風檜獨存任春予亦可交誼與君論  
虎丘與包彥平會別

湖海聞君名已老把臂那知比予少城外青山明月  
生一留一去皆同照照處花開鐵樹高茶烟片舫出  
僧寮榜人醉臥客相送獨自解維斟酌橋

燈下看菊

日日問花去歸來空醉眠那知好秋色只在小亭前  
幽賞恐不足明燈照孤妍來朝深閉戶但送酒家錢  
同伯傳晚酌元爨水亭因懷郭二

山亭半在水列黛正相當鳥路田間去帆雲樹杪翔  
懷人隔秋渡閣酒話斜陽有待看紅葉應遲幾夜霜

籬落

巖棲容懶慢卒歲少逢迎所喜籬落間亦多山水情  
風吹木葉盡的的孤花明尊罍置卧側起坐還復傾

郭聖僕紅絲石研歌

漢武射蛟蛟不起蛟冰片片凝紅髓伊誰斧取作君  
研拭手還愁化爲水水霧重重浸月痕千年殘墨繡  
雲根素絲不斷繞三匝又若組織煩天孫君藏寶研  
幾盈櫝下巖青紫鞏昌綠一朝得此堪盡廢赤帝發  
靈鬼神哭神物由來好事傳連城已享中和年吾家  
仙令務高識中心好之不能得願擲丹砂一百斛更



乞青州二千石

懷張子明

老去懶題書逢人常問予以爲湖上卧亦似溪中漁  
一衲支寒早雙林蹋月徐別時吟五字風韻自蕭疎  
薄暮放舟湖上卧看秋色

漲平霜降後日落烟開際山葉照深淺江霞攪空翠  
扁舟蕩無偶殘秋獨相對言從水上來却向林中睡

初冬日適園看菊同孔先生得春字

季月已更朔始看時菊新兼之霜後暖花氣靄如春  
趣得竟忘我酒開應待人竹間書屋裏一種淡無鄰

聊城箭

魯連先生高潔人寧蹈海波羞帝秦燕齊兩閔事旁  
午先生不得寘不顧一箭如從天上來將軍泣死聊  
城暮暮色蒼蒼陣鳥呼城中芳草幾荒蕪尺書千古  
懸日月世上空傳金僕姑

博浪椎

祖龍毒焰熾海宇六國縱橫無一旅子房孺怯如婦  
人壯士金椎力能舉博浪沙中一擊時遂令干櫓起  
畚菑大索軋坤不可得唯有老翁潛識之之人以前  
亦何有五伯之功屬屠狗

邯鄲枕

邯鄲之客同舍居爲語困阨多嗟吁囊中一物忽探  
與所遇悉從心所如遇極其榮未生隙主人已索囊  
中物茫然相失不知處彼復何來此何去由來枕上

足平生高枕何必邯鄲名

虎丘尋陳仲醇昨日已行

委蛇循澗道復上生公臺欲攬孤雲住偏遲一日來  
空香水浮出野色風吹開竹裏尋僧語送君猶未回  
鐵佛山房夜會姚百雉君左賦別得踈字

山氣入寒初披烟摘短蔬兩逢一姓客同借雙林居  
水滴蓮花斷星搖竹樹疎若非看竟夕明發更何如

別郭二寺居

住久若安禪山花開一年中林忽到客行灶幾無煙  
寂夜此相對別懷俱黯然題書應自懶歸信口能傳

山房偶贈

楚服蕭蕭無綺塵幽懷耿耿寄雙顰曾緣五字知名  
媛已三年避酒人奩月影搖江上練瓶花香動臘  
前春只今市道論交日媿殺蛾眉一片真

送羅廣文季珍計偕北上

賦價應先貴上都一瓊離色動霜蕪江峰寂寂湘靈  
瑟波月盈盈海客珠白野風嘶朝秣馬濁流冰合夜  
聽孤鶯花對酒當三月山水論交隔五湖相送莫言  
予獨後心旌搖曳出王途

寒夜泛秦淮

枯柳不垂烟蕭疎古渡邊寒生霜落水光動月明船  
客夜獨乘輿倡樓多醉眠衆聲歸一寂空擲買歌錢

別澹如

歲晏客愁侵君能慰我心霜晨或共出月晦亦相尋

幾聲牀頭甕頻驚巷裏砧明將理歸楫欲語更沈吟  
宿吳門

市聲喧盡響風湍篝火青青照夜寒歸到吳城猶是  
客兩山殘雪夢中看

渡石湖

風攪帆陰亂法幢山懸塔影墮吳江白鷗慣聽橫塘  
曲來往飛飛自一雙

日暮山寺問梅花消息

日落水浮氣山寒應乍回獨居恒簡出生事及尋梅  
但有僧知得曾無客到來幾枝雙樹外一歲兩迴開

聞松風

山昏氣若鬱忽然吹復開人烟四野寂唯有松風來  
謾謾滿清聽蕭蕭生暮哀於茲愜所性嘯咏臨高臺  
聖僕伯傳看梅還虎丘因寄丁南羽秦京姚百

雉君左

鄧尉山中五十里蔡仙洲畔一千家春風作意橫吹

雨湖水蹴浪高於花二客乘春發春渡梅花落盡空  
舟卧香魂招得寄情人白雲宵宵真娘墓

贈德操

無日不懽然客來猶自眠會當修禊後詩在永和前  
花氣薰爲酒山光冷壓船到門幽草遍一徑踏春烟

送伯傳游黃山

此別有寄攀君行我閉關帆前草遠衣上落花閒  
雲懶應堪托春忙莫共還問岐雖白叟恐未識黃山

孫照隣壁上畫松歌

徂徠山中曾見汝一箇壓枝千尺許忽向孫郎素壁  
間夭矯生風作龍語畫師老筆胡其適神奇不數張  
僧錄他時點墨恐飛去蒼藤纏縛拿雲臂

湖中別聖僕

春湖一胡滿春蒲一胡短時鳥鳴嚶嚶新楊綠苑苑  
日半帆陰直風柔浪花暖相對自生情將離復誰縮  
雙艫忽向背行行入煙遠

懷張林宗

憶爲雲水別幾度春風生有客尋南館知君去北平  
高霞空旅爨殘雨動交情一出思玄賦無人學長卿

花落

花開儂不見花落儂不知儂來花落盡看作未開時

寄懷曹能始先生

別時遵鷺渚望處極蠶叢字折三巴水書迴萬里風  
編氓得司馬屬郡有文翁雖在煙霄際不離山水中  
雪殘岷樹綠雲出廟花紅曉轍初還北春帆又指東  
何由爲楚客相與醉郢筒

答周公美

春來何處看春山知我春眠在此間遠寄一牋雲裏  
劈未移雙槳月初彎廬中草暗空原暮水上花飛獨  
樹閒風信作寒頻中酒不堪啼鳥自關關

吳六

幾晨披海霧幾宿傍江霞投止難容寺歸來不住家

血枯書貝葉戒破飲梅花相訪何曾見入雲歌采茶  
王百谷先生挽詞

孑然一病叟貴屈千乘候居然四壁立名在天上樓  
多士善家法小郎亦子猷予生後一世且越湖之洲  
不但借齒頰心神每相求哲人今已去胥江水空流  
懷中有敝刺來從九京投生交固易定如新悲白頭  
既死結忘年千秋以綢繆

過金德公墓

相送心曾到言尋路不迷草齊封鬣起山跌浪痕低  
片石看人拜孤花奈鳥啼夜長誰慰藉應有鹿門妻

哭沈子勺先生

臨別那曾祖路隅相思頻得夢相呼養痾寺裏官何  
事渡海舟中石也無一片蠻歌風動遠三聲猿唳月  
明孤青楓碧柳迎丹旄昨夜江頭幾樹枯

雨中懷訥公

尋人無定所行脚遍他山歲除空一鉢獨自雪中還

索解草  
三四  
我欲遠相訊春來曾未聞不如風雨意日日到禪關

雙燕離

雙燕飛雙燕棲一去西家東一去東家西柳風吹香  
花自迷花自迷不相見春愁冷閉宜春苑

范東生自蜀遊楚還越將過湖上

雪流隨處滿帆掛楚山低一聽鷓鴣唱何如杜宇啼  
江草春相遞江雲莫不棲遲君五湖上幾宿在苕溪

送鄒舜五游茅山

於此曾懷汝寄聲空外聞邁游今過我獨自握靈文  
花月明春澗松風屬隱君短筇無不可觸處卽仙雲



獨往篇原序

河南張民表撰

往予游泖澗十日而返人日子亦聞飲酒及茶者乎  
酒雖美一飲就醒則齋餽同味矣茶雖甘一飲沃渴  
則斟協滄品矣子之游也得無類是乎夫片石之崆  
峴半泓之澆漚也鑄日之爐鑄不飛一爝經心之纂  
組不斷一絲然後悉水石之狀盡水石之情得水石  
之趣也予曰罔象拾珠爲不用明焉飛衛學射爲不  
用巧焉呂梁汨浪爲不用力焉商丘礪石爲不用智

焉遊於水石者安知水石者也化人中天四夢王氏  
夜雪還舟予以十日猶覺扶搖非遠汗漫非久矣清  
暘旭景長鏡牽光疊絮叢花開靚朗艷吾之游心和  
以暘也鬱儀裁規馮夷洗練萬籟消停孤明灑湧吾  
之游心寂以澄也細雨聲波蕩雲罨樹沿深洞炤擊  
汰空寂吾之遊心閑以冷也欹枕啓牕周旋劉攽碣  
迴天豁萬頃森茫則鴟夷之五湖也浮雲橫黛玉色  
滲人則湖上之洞庭山也縹渺無垠若來若往蟠紆  
成象乍顯乍微中似有句而未呈口似欲言而未肖  
及於白下得葛震甫閱其詩吾知之鄉者洞庭之上  
矣葛震甫洞庭人

獨往篇

震澤葛一龍震甫著

上谷張居如磐校

雪夜懷秋潭上人

幾家驚曙早開門  
幾處人歸失舊村  
白卷屋茅風獵獵  
獵樹凍連雲花夜  
發吾師此時宿未  
曾襤褸破衲挂殘  
冰一鏞折足寒無  
火聽盡啼烏獨吟  
苦

響屨廊

君王得越女，憐貌復憐聲。爲廊帶別館，花裏出盈盈。  
冶步搖春去，文楸雜珮鳴。後塵誰得踵，空籟至今生。

一月

一月閉門臥，似與酒人絕。春風不曉事，吹落花上雪。  
壇上與明生，實甫寓目。因懷女廉仲和。

日夕幽思起，野雲歸未曾。歡來同踞石，陰處已懸燈。  
片影擲輕鶻，雜花粘古藤。美人春共遠，烟浪碧層層。

細雨

絲絲織織帶，朝陽相識東。風欲斷腸吹，上酒衣春一  
片半。和新綠半新黃。

送羅季真宰霍山

數載未一識，溯懷唯好音。又爲民社寄，終負水雲尋。  
背雪移青舫，乘春抱綠琴。只看桃李樹，迢遞接棠陰。  
題蔣昌肆壁

女年未三十，濩落竟無比。昔交盡婉孌，多半爲情死。  
肝膽曾幾人，按劍忽相視。子身更誰與，一肆正臨水。

雖乏當壚妹已得垂簾似時維春夏接家家燕新乳  
園空桑樹白風卷棟花紫躑躅犢鼻禪自好足安此  
寺中梅花

一株移取傍松寮月出東林不待邀客况似僧花似  
客歲除相與到花朝

立春雨雪正交加自折枝頭供佛花別後看花好相  
憶今年今日在僧家

徐朗倩諸子過余家園之吟壇眺飲日暮

往跡唯豐草幽情尚窈然會知閒日好春覺酒人賢  
積水下空影孤村明遠烟歸舟渡不可風攪落花天

香水溪

窈窕一溪綠流出吳宮裏郎莫浣春衣殘香膩流水  
郭三聖胎游燕不歸放歌以招之

秦淮夜半傾離酒君歌北風我擊缶縱橫意氣荆聶  
間落魄行藏牛馬走幾度花開客上林上林春色厭  
春心當時同舍已歸盡唯君賣賦堆床金牀金散落

風吹雨那得音書擲  
牛渚蘼醪潔裂如井泉  
越兒冶容若燕女  
一飲一歌無旅愁  
肯念故人湖水頭  
故人久謝彈冠禹  
掀眉每自登高樓  
樓高不見昭王築  
燕南三月蘼蕪綠  
蘼蕪綠徧水烟荒  
戴勝將鳴陌上桑  
舟暮與澹如飲別

引纜垂楊細傾壘  
躍浪平閒情亦自得  
離况與君生春去不多日  
烏啼無一聲指看歸路  
半山缺野橋橫客至

童子喜相報客來湖上村  
湖上雨新歇斜陽同入門  
李維節象先兄弟城南新居作

移居不出郭問路轉生岐  
雨白村杏遠烟清門柳欹  
爲山因壁壘疏澗引潢池  
嫩葉初生蔭新流未斷澌  
風傳盧女曲絮舞謝娘詩  
二仲皆余好孤標每自持  
聽鶯乘曉過詎報主人知

翠峰山居訪陳眉公

山開積雨後行拂翠氤氳  
未到客投處已無人語聞

閣鳴松偃瀑花盡鳥啼雲片石澗流上結茅知待君

采香涇

吳宮種香香滿山旁蹊直入山之灣美人嬌酣朝未  
起采香已到吳宮裏薌澤應隨美人歇城上啼鳥復  
啼鳩只看一水劃山烟風吹野花香可憐

訊唯心和尚

短榻一燈照五湖雙樹懸自然閒得計何莫病非禪  
澗鳥啼春雪山花出暮烟隔川將遠信因以載名泉

再過眉公山居

遙看一片雨來始覺青山自與夏相得豈惟僧獨閒  
瓢笠雲水外語嘯松風間泉聲會送客珍重出花關

獨愁

湖上獨愁客雨山相對昏明朝出山去愁復與誰言

煉藥洲懷蔡仙

仙人或可學到此空茫然一方散白葦萬頃浮清烟  
雲車渺何許風帆忽來旋冉冉日西下躊躇湖水邊

望柳陳甫墓

昨臨楊子渡痛哭聞君訃今踏長干路未得拜君墓  
古墓新墓相爲隣野雲絮絮粘荒榛詩名難掩一坏  
土生前已是千秋人

雨宿土橋懷元爨

出郭披朝雨絲絲到夜昏但看燈一點不問幾家村  
倦客易爲宿主人聊與言子猷曾借此新竹兩三根

周郎橋

江左風流盡郎名寄野橋水流車馬度今日又明朝

歸湖上

久爲江上客諳得風波性今從湖上歸白髮對青鏡

寄龔仲和

濤撼秋廬霜葉乾美人西渡海雲寒欲爲地主空雞  
骨不媿山祇自鷓冠花舫具區橋畔宿苔編林屋洞  
中看別時繾綣猶堪憶疎雨吹香解佩蘭

寄汪無際



帆渡忽入遠遠雲猶自閒空思剪夜燭相對寫峽山  
書去或未達別來唯掩關冰霜正如此能不摧心顏  
同許元燮青溪夜泛

客夜及殘年其如不醉眠再開燈下酒同放溪中船  
霜柳難侵黛風花易失妍橋迴城礙月半影落潮懸

旅夜送吳六

行李何曾挈無人共去來客居秋衲借歸路夜帆開  
江寂鴈聲遠月殘霜氣催石門松影落先爲掃蒼苔

臘八日訪公訪不值

前年今日會坐客何紛紛把握正集霰飄散亦如雲  
今年復今日空山掩蓬華師還訪余來予若爲師出  
天寒風色緊四顧愁人心邂逅不相值白花開滿林

送百先

無日不一見見卽語依依捉臂忽生別骨驚心亦飛  
山雲暖蒸雪湖風吹浪微還家有慈母先已縫春衣  
待雪同黃伯傳鮑伯英得埋字

開園雪意滿况與幽人偕炙酒坐相待攬衣時歷堦  
簌簌鳴亂篠亭亭立高槐今夕莫漫醉醉看籬根埋  
無日過姚佩卿隱居

瀨淺維舟遠山紆引路徐相尋恐不見相見喜何如  
積雪村村斷斜陽樹樹疎門人共宿酒中饋炙枯魚  
歲事將歸客衰遲漸及予松聲動高閣風葉亂殘書  
前平升父元爨過訪虎峰石上

山晴冬借暖消息到梅花有客石上坐見我林中家  
空水動遠影野衣生片霞吟榜獨維處夜火明江沙  
送徐朗倩

雨雪催寒盡林香漸漸還憐君別今日帶酒下青山  
野棹無人渡烟扉獨樹灣春眠何處問應只在花間  
寄周公美

君來苦炎熱我衣正如雪且不知有生那知攬芳潔  
忽忽今歲暮蹇蹇丘中卧遥遥一片心日日江雲渡

寄蓮儒師

山突水之涯林開帶遠沙每從居士出亦到酒人家  
相望忽新草所期猶繫瓜江春雪後渡因致佛前花

月夜衲公林中看梅歌

飲客不醉夜不眠打門驚起東林禪林中明月散如  
水泠澈倒侵梅花天梅花已放幾朝白客欲問花花  
笑客老僧曾寄雪中語長至之邊有消息消息沉冥  
臘復春却從月夕較花晨花月得兼兼得酒不妨來  
捨佛前身

出門

百日止酒懶出門一日出門携一尊何處花開不看  
去何論山寺與湖村

夜泊長橋同斗一君熙作

虹梁亘一里半入溪花叢縣郭浮居繞江門照影空  
月寒春剩雪漁集夜無風語謂同舟客前年過此中

舟中寄養浩

一帆若駑馬一帆若飛驎相望忽相失明月照獨愁

獨愁風夜起再宿藤蕪洲羨爾先驅者何曾知石尤  
吊楊烈女墓墓在澱山

楊家女唐家字郎面未識心先矢一朝不得同棺死  
委曲三年畢終始山合抱樹連理三姑之祠是隣比  
雙魂悠悠適於此青楓愁絕露筋耻

答舜五孝真泖上見遲

月白夜難午風掀浪如屋我舟不敢渡且向廬中宿  
知君離不遠置酒秉高燭忽復開門出臨流一舒目

春渡懷郭二

片舸乘春去春禽語正繁偶經曾別處猶自黯銷魂  
雨度隔花蟻漲來平柳村漫游知己倦誰共老衡門  
過眉公余山別業十六韻

度水分枝曲飛梁接岸斜田頭起茅屋路口折籬笆  
地稅先移竹雷鳴試摘茶乍容傳木簡旋拉看梅花  
磴歷從魚貫亭窺匿兎且霧香迴冷氣雪艷染餘霞  
衲野疑逢遠山刊猶姓奈俯身親鳥坐徙步覺風遮

落日照人下入門如自家濕烟清澗爨香飯出仙麻  
戒莫煩供具真偏陋咄嗟縱懽過一石分踞得枯槎  
醉墨邀雙玉春燈艷九葩碎聲調瀆索溫語及蘭奢  
披寫能相盡汪洋詎有涯還聞數里外小築帶鷗沙

舟夜憶梅

白石山中三百樹一樹一杯曾徧看今夜孤舟練川  
雨瓦瓶篝火折枝寒

歸夢到家殘月上滿衣春雪帶香苔山妻詰問客猶  
醉知看梅花何處來

至婁江追感劉先生

先生舉河南歷官嚴州司馬卒於官

一把入林臂如涪納於海一失桃李時春風不相待  
偶從東郭艤百雉沉烟靄欲問先生廬空廬復誰在  
欲問先生墓墓隔數里外雨哭下孤舟北面舟中拜  
月且寄女南清風滿巖瀨

儀亭曲

獨行篇  
侯潮館前風夜催潮不來時船不開不是儂船候潮  
度潮頭會約報郎來

南湖夜望懷孔先生希明兄實甫弟不違姪

家在此山上纖纖如翠眉乍離渾不覺相望轉興思  
月淨水還濯樹疎烟或披一春曾幾會已過梅花時

寄贈眉公高齋慧解上人

先生事法王客有緇衣郎鳥路盤危築魚聲出上方  
雲蒸山骨暖花落水田香記得留余住風巢對雨床

獨夜

春好偏爲客浮家獨夜情過婁湖月滿入越路花平  
水棧僧歸影風村犬吠聲數峰新漲裏看去轉盈盈

烟雨樓同君熙作

烟雨樓頭春乍晴鴛鴦湖上鳥嚶嚶中浮片席空三  
面斜抱千家截半城漁網晒來風柳變酒船搖出浪  
花生夕陽慣照憑闌妓一抹遠山紅袖明

百先雨宿齋頭

一日晴未足十日雨如瀑勢决太湖水翻我松下屋  
君來始開門未夕舉燈燭留懽何所有有酒十餘斛

稚孫歸

林中相送去曾賦秋鴻詞花下此攜手恰當春艷時  
病得我偏念遠歸僧獨知園池久不到魚沫濺鶯枝

雙姝吟爲戴君賦

鴛綵翩翩不單宿邢溝淒冷藤蕪綠得逢君子結情  
絲合貯吳舩當金屋泛泛西湖花月春西湖花月盡  
生塵昨向雙喬門外度傾城爭識再來身

曉色

新鶯喚客起宿酒尚盈尊原野不堪望遠烟猶自昏  
紅淡西牕燭白來東郭門門前楊柳徧離緒轉難言

秦以德湖上答詩

每懷千樹橘中有幽人居忽接數行字是君前歲書  
春湖豈難溯橫棹且躊蹰浪頭花信起二十四番初

江行見燕

燕子歸來我挂帆江頭瞥見語譚譚愁緘遠信相將  
寄香雜新泥莫浪拈萬里烟濤春去國故樓門戶晝  
垂簾卻憐送別無多日風絮鬢鬢兩鬢粘

徐日方水亭雨酌

結宇蕪煙際披紗柳浪間新鶯同客到微雨挈春還  
呼取隔離酒看他何處山重來須蕩槳荷葉已斑斑

在澗齋

幽人住南澗澗水屋上立濺瀑雜嵐氣清泠沁山骨  
閒爲考槃咏抱膝對暄日客以飯芹到松烟正炊濕

舟卧

塵勞委支體買舟如買宅舟中只合睡忘語亦忘食  
截天風雨來驚我夢驅策起視茫不知朝暾已昏黑  
聖僕客舍喜會林二茂之出示鍾伯敬詩

自卜城外居兩度客城裏雖爲一城隔無日不來此  
飲矣復將夕得我林叔子叔子數年別把握具悲喜  
朗誦鍾期詩移情海波水露坐天風下空涼酒間起



抱關警客散擊木響無已戲語此開設豈爲我與爾  
寄雨公

以爾願初畢一瓢行脚寬那知出世法不及避人難  
雲月千峰寺香花五戒壇微吟雖自好或得寄余看  
苦熱

苦熱不可釋却來樹下坐日落潭水中精光射如火

送陳徵君歸四明

秋風戀徂暑吹動水烟熱與子結新歡孤懷耿將別  
言從若耶去路指鏡湖月散髮蕩扁舟荷花櫓前折  
澹如過別湖上

早來湖上棹莫是散秋暑呼酒斫霜鱸樂此菰蒲渚  
忽言將遠離風吹白鷗起今日與明朝相去五百里  
山中秋夕懷弟實父

白月上高樹光滅巖中燈草蟲亂無緒忽焉鳴裂繒  
酒氣散清露露坐偶良朋念爾飄零者一如雲水僧  
姪子九素軒成時喜舉子

豁然高樹下一舍啓秋夕阿季善居此繪藻盡皆斥  
予言太皎皎無寧守其黑待看襁中兒翻鴉滿空壁  
寄東生  
我夢尋君君不知夢殘無奈轉相思伍胥門上夜三  
鼓十畝園中星一池

秋陰

西爽忽自晦不知朝與昏井上半殘葉湖中無遠村  
桔槔幾日罷農牧相過存雲淡一如水野風吹到門

寄懷李九

思君夏之日日在東園東泉漱松根下石搖潭影中  
睹棊來木客司果有徂公昨夜秋聲起帷褰栗葉風  
爲茅止生悼亡

佳人可再得再得寧復佳愛流亦易斷并刀難入懷  
仙去豈留裙燕化無遺釵如能九幽照明月終當埋  
秋夜坐雨懷孔先生

湖口雨將夕人家栖水禽一燈相向說兩月未曾陰

忽復散空響自然生遠心隱居知卧早門掩秋花深  
翠峰山居晚眺臺上有懷

日夕井氣上臺荒莽烟翠懸棧出重屋諸峰盡平視  
晴雲慘作雪青松蹋如薺寒暄稱衣袷風氣屬秋季  
坐與藥師偶痾瘵得無累徘徊寫深情孤隼落山背

登句曲山寄友

春霜頻雨厲花晨絕頂生寒綠未新孤眺劇憐無處  
斷昔游多悔未成旬林中木客吟山月石上先生記  
海塵松寫野絃泉寫玉不堪遙寄賞音人

送女衡載郁登泰山

全魯植一山東以海爲沼天地直相接日月無間道  
曾封七十君亦復禪云云漢瑞旣洽德秦碑獨無文  
行行杪秋去一路巉巖裏風舞松栢林白雲如浪起

明月篇

明月明明娟娟未已忽盈盈朝朝却向閨中落夜夜還  
從塞外生生處那知落處愁閨中塞外一輪秋秋風

陣急雲爭度秋影無端帶流火昨日蛾眉人今宵面  
如土古人不我待今人自成古今古何人不照來人  
間何處不徘徊徘徊當素魄脉脉空沾臆豈無一夕  
歡但有向隅看歲月離鄉遠關山行路難路難行不  
息鄉遠無歸翼石上千椎搗練聲機頭一片流黃色  
搗練復流黃年年枉斷腸腸斷年年君不見只看明  
月如君面

閣夜懷姚珮卿壽卿僧可南

小閣似漁舟濤聲閣上頭有懷空竟夕何況對窮秋  
雨磬沉雙樹烟燈照五浮不知啼去鴈會下白蘋洲

寄懷金伯獻澗上

在澗足幽偏秋聲共一泉慣喧松雨後亦繞菊籬邊  
微瘳堪爲適孤吟得自然度湖曾訪處帆影拂茶烟  
月下看寺中芙蓉

艷艷拂烟新相看或未真何來蕭寺裏一似楚江濱  
根淨終皈佛粧成不嫁春月明霜落夜空憶采芳人

登翠峰新閣懷眉公先生

新閣已歸然來登日予早如在深澗中倏忽天地表  
振屐躡空翠憑闌俯騰鳥太湖開一面直可見三泖  
憶與先生別於茲藉幽草

湖中

日沒烟霧深湖中山水黑拏舟出菰蔣兩棹互相擊  
問予何處來同是浮家客

賦得雨中紅葉送鄒舜五之泖上

雨晝接霜晨山山秋色新獨憐搖落樹偏管別離人  
冷路吳江上孤村澗水濱臨岐題一葉沾濕奈情親

遂園雜咏

石影池

片片青芙蓉出自仙人掌日照滄波間倒挂珊瑚網

柳幔橋

烟縷麴塵色織織覆朱闌彼美過橋人風吹春不寒

敲月亭

隣鍾敲月落聲在月明間月向空亭照幽人獨自閒  
薇柴

綠刺冒晴絲紅香蕩輕霧主人欲留春障斷春歸路  
斷香徑

一徑出花塢委蛇通夕陽花開香不斷斷處始知香  
松墩

甃石亂無次高高積寒翠一鶴懶應門每來松下睡  
篁塢

塢深唯種竹見竹不見人中有新鶯啼始知今日春  
趨侯幢

我欲營糟丘還來問趨侯一幢如併借銷盡此生愁  
明生至

憶別泖湖上獨行愁過橋傳聞歸幾日把握自今宵  
寂寂遠香度微微空露飄無言惟勞苦白月在山瓢  
賦得秋帆送端卿

宵宵向空碧飄飄誰與同天長一萬里是處鯉魚風

忽復片鴻外獨明殘照中離魂曳遠影愁入江花紅  
雨亭對菊懷仲和無際時一公衲公至

去年開菊處得得引烏藤忽又見秋色竹闌空自凭  
短籬寒寂夜疎雨濕孤燈蕭瑟無端意賴茲來舊僧

送恬公東渡

出山何草草曾對幾黃昏落日照行脚白雲空寺門  
挂瓢半死樹乞食三家村只在太湖上水田吹浪痕  
月下對菊送弟實甫

澹然遲莫色不厭菊花叢秋盡疎籬下露溥明月中  
在家無爾我出門有西東更深曙又促愁殺噉離鴻

十月十日看菊孔先生家

重陽過一月看菊此軒楹幾頭皆傲色多半未知名  
轉覺主人好兼之風日清余家籬落下尊酒負平生  
晚香亭月下懷聖僕

霜輪一何嫵皎潔出庭樹樹孤光滿地寒水不生霧  
吾輩兩三人各以影回顧顧影復躊躇豈不動衷素

清淮夜潮上窅窅月中路知君神亦馳來往或相遇  
俞仲茅舟次喜會李本寧先生

冽冽城上風湯湯城下水水風自相激散作吳閶雨  
吳閶塞舸艦余舟泊如蟻不與故人別何由會夫子  
夫子百世師奔走天下士大不失須彌小不遺碣礪  
幾時渡江淮幾日在於此欲爲少盤桓後期良有以  
或踏長干雪負瓢從杖履

送無爲

一身多難後皮骨盡皆空況此沍寒際遽然離別中  
辭林如片葉度月帶孤鴻莫作廬居夢松門夜夜風

哭愚公

去年七月誅吾父今年二月誌千古我痛君痛無兩  
情君病我病異死生訃聞忽度太湖水天地半壁東  
南傾有書克棟子能讀有母龍鍾爲兒哭素帷黯黯  
一燈親遺貌仙仙寫得真世上易爲長別苦莫來重  
現宰官身



送衲公之彭門兼寄實甫

落葉滿風寺亂禽號雪園獨持空鉢去何處乞朝昏  
野甸荒殘燒河堤積凍痕倘然逢阿弟已是到彭門  
鳩峰送萬二之泖上兼寄朗倩明生舜五

特地一坏起宛然湖中央與君別於此對酒情如傷  
寒水照荒路夕風來寺香平生二三友相憶在鱸鄉

冬至夜

至日明朝是孤舟此地逢惟他燈黯淡照我袖龍鍾  
蹙出關親慮長征味所從打水誰急渡寒響答村春

至白門懷介孺兄

莫以君爲長予衰覺更殊向同愁一綫今各有三雛  
江寓那堪臘山田不稱租來從白門飲又說過蕪湖

逢雨公

庶事亂如髮薙却無一粘物累苦如茶嘗來同一甘  
已除世間籍猶在世間住放脚白雲生回頭山鳥去  
對面不相識居然行路者昔別非夢乎今逢亦夢也

陳志玄挽詞

相失知何地風吹滿面塵自騎冀北馬不見淮南春  
脫家百口累從死一官貧積雪高新塚啼鳥感夕隣  
鴻泥留跡處鷄絮涉江人泉壤無朝日厭厭得醉民  
入山詩爲圖南宗侯賦

入山惟恐不山深深入山山誰得尋拂衣花滿霧香  
濕抱甕松根雪澗臨草芳春莫未嘗倦蓬戶朱門無  
兩心一自白雲招引去手栽青桂已成林

鷄鳴寺送周六端卿朱十四文台還山中

山開城畔寺聊寄客中餐樹落湖心影堪從枕上看  
相尋幾日見爲別一年殘奈我還留滯冰霜獨自寒  
謁談季曾先生賦投

字滅懷中刺投君許見之仙曹在天上何異入林時  
澗語從頭問清風滿面吹鍾山高積雪相對碧簾披  
小除夕七里岡店宿

歲杪還行役投栖野店空牛衣夫婦對旅況主人同

爨壓危簷雪燈吹破壁風一冬更漏接都在此宵中

鄭翰卿挽詞

一掬窮交淚臨風爲爾揮白門無日見烏石幾時歸  
越客初逢晏秦廷轉妬非才名是何物終累薜蘿衣

馬上逢徐日方

脩坂入河水枯楊挂山雨此地却逢君匆匆不多語  
馬上雙玉童光輝動眉宇明日到秦淮羞殺秦淮女

半塘懷李長蘅

廢刹斜陽樹葉吹風滿田不堪蕭索裏曾是別離邊  
去去且游越行行還入燕雲寒雪意苦何處孝廉船

看劍歌

風颼颼天地愁練水一條凝不流寧爲熱腸死不受  
冷眼視千秋之物有於此千秋之人幾知己

安小范先生訪湖上不值留詩見贈次韻奉答  
翩翩絲鷁似樓居纔渡湖西卽問予路入野蕪山雨  
細樹殘秋葉水門虛未能炊黍先迴棹不待籠鵝已

得書若弔仙人舊棲址銀房金竈冷丘墟

丹陽作

江流河流決如矢曲防新築巘巘起雲連粉堞兩重  
城風嫋綠楊三十里小時行遠不知勞每向長安過  
此橋衰鬢還騎款段馬春泥滑滑雨飄飄

牧童詞

牧童不識字口授田中曲一唱柳絲黃再唱草根綠  
日落卧牛背雨至潛牛腹雖日不須歸村村有茅屋

燈夜張有光諸子會周端卿家得君字

啓筵燈閣裏到客已醺醺鸞嘯半嶺發雞號如晝聞  
花枝壓酒甕春綵結空雲此會誰年少周郎却是君  
、范穆其雨中渡湖見訪

春寒草未綠寂掩山中扉湖口一帆落是君疑或非  
坐來無所問別後可曾歸風遠雨香細隔花吹濕衣  
雨坐空響齋喜八公至

素壁有雲氣一燈明遠烟樹喧生夜寂花冷折春前

衾枕若臨澗尊壘半飲泉子然方外友來作雨中緣  
吳居士招同金斗一虎峰石上看梅

一春將過半今日看梅花花杪石堪踞松深陰不遮  
風來衆香國雪落幽人家已夕何曾覺酒邊新月斜  
實父弟訪寒山因寄趙四凡夫

數里無鷄犬一山藏曲池到來花事過只覺春風遲  
供石千燈裏存松六代時髯郎予阿弟相見可論詩  
郭二得舊竹杖甚竒把玩賦此

先輩何人削黃玉圓澤子瘦古而樸冷光如水潑人  
日落君手中心愿足或尋花去闖深曲刷破春雲幾  
層綠或看殘碑倚摸索竟日不坐夜不宿百年過四  
尚餘六五岳三山此相逐惟君加重我爲勗君不見  
葛陂之龍鄧林木

東等慈 有引

等慈師曾約看梅菴中予不得往師復出山來會  
郭居士家予過居士師已早去時風雨生寂把苦

竟日臨別賦此聊寄所懷

侵晨出郭門底夕對風雨不見素心人  
綠尊空自舉  
曾聞明月中寂向梅花語客將襪被來  
幽期無負汝  
梅花落已盡明月復如許春事何蕭蕭  
山行獨踽踽

得卜伯符昌邑書

使君臨海邑詎少簿書煩何事廬居者  
猶然得記存  
山深寒夜火江碧斷春魂欲作匆匆報  
平安不忍言  
雨夜同聖僕長干寺送鄭四君熙

柳色明朝滿愁生隔夜新同君遙出郭  
行路已無人  
把握在俄傾盤桓才浹旬奈何方外雨  
又是客中春  
過魯波臣淮上居因乞小影

雨中曾別去今復雨中過已覺歲時遠  
轉憐丘壑多  
置予堪在此問爾欲如何不然湖水上  
隨意攬煙簑  
過國華王孫園亭尋梵僧因會孫伯觀  
伯觀心  
交數年於此始面卽有宣城之行

帝子園林花木新居然舍利國中春  
過從得所元無

想邂逅逢君却有因隨意盤餐同餉午及時風雨在  
江濱敬亭山色愁相望明日清明客路人

送徐日方北上公車

山人不識燕山路每看雲氣天邊起今向天邊一送  
君燕山去去三千里風吹柳色過江綠染却春衣似  
春水明春此時歸未歸歸時應換別時衣

寇園再送日方同生予聖僕肇禧

祖筵開向阿誰家門掩春風幾樹花曲巷小園斜影  
照鷓鴣飛出半窻紗徘徊轉竚幽房側天上人間此  
相隔博山沈水裊輕烟煙霧中人半予識如酣如夢  
復如迷竹肉和作新鶯啼使君陌上桑初綠公子天  
涯草未萋酒後却嫌燭不滅日成無那人將別脉脉  
閒情片片愁秦淮流水盧溝月

贈楊校書

十三理長袖十五厭高髻問名知行幾於世豈能雙  
鬪草向南郭折花臨東窓微風動秋水初月漾春江

雨公寄松花  
予家茅屋松陰中  
花卷黃霧空濛濛  
年年此時黠烟  
火飽却儘意還  
春風何爲城市日  
奔走日噉馬頭塵  
數斗山僧忽漫寄  
松花愁殺春殘未  
到家

來燕亭爲湯使君賦

宛然村落中  
半出杏花叢  
花開新燕到  
相與爭春風  
晝影斜翻紫  
晴泥濕綴紅  
江頭有消息  
來報阿家翁

讀李孔凡遂園集

昨日醒君酒  
今日醒君詩  
詩中何所有  
盡寫園林奇  
園林之奇不可盡  
石色古蒼水色嫩  
花光的的蕩春  
日松聲颯颯驚  
秋鬢我不願爲  
客願得爲園丁  
除却犁雲與鎌水  
一編細和松間亭

白黑三月三十日留別張子明溪上

幾重溪上綠  
一雨一看新  
奈與丈人別  
更當今日春  
氣寒先麥候  
風苦足花旬  
對此益堪老  
已絲那得鬢  
得國蔚書因感易之



睽孤十九載顏鬢不可索但看吾鏡中應得爾相若  
忽寄遠書到讀之淚雙落感念潮陽君生死竟誰託  
送景如上人護藏還蒲田丈人限更當今日未  
白馬西來後人間貝葉開汗牛東去日海曲蓮花栽  
行路出雲木護法持風雷無論幾千里到卽是香臺  
細字詩贈鄧君彰甫  
羲畫以前未有此羲畫以後此亦無閉目養明數日  
始得見只覺秋毫易數春芒粗我有八角扇半寫五

岳滄洲圖願取一角爲我書三都

春暮白門聞新鶯懷孔先生吳居士鄒六郎萬  
次君蔣甥閔大訥公髯弟

出門柳絲黃漸看柳花白韶華曾幾何奄忽盡虛擲  
陌上新鶯聲却於今日鳴身藏不可見宛轉客中情  
客中情最苦青山有安土一一故交親爲予愁暮春  
穉孫病寓勝公房寄訊

汝病今何似予憂未減前去家頻借寺積日易成年

芳草獨行藥野花相對眠床頭春甕淺莫惜畫叉錢  
別郭二  
客游五十日所作者何事將欲與君別爲檢篋中字  
一日不相過計有一牋至

哭張後之

赫赫上葵公吾道久尸祝長君世其業藝苑張之鵠  
結交豈無因世短別何促昨聞西州訃來自東林足  
此生無再期贈語空在握出門浩茫茫北向野雲哭

出白門諸故人送之別復登土岡上相望良久

悵然書懷

客子將出關味爽集親故携手與行行行拂春霧  
春霧濕春衣去住各相顧相顧摧中腸旣別登崇岡  
遠近可十里霧開塵復揚僕夫向予說前路一以長  
繾眷乃如此恐非還舊鄉

舟中懷王元直

二首

別君之日君有言今年三月會都門開殘芍藥不見

面空棹一舟歸舊村

柳絲千尺掛江頭肯放殘春送客舟不是我舟率不住恐君先已到蘇州

四月八日經堯峰觀葬湛川師

不見說法時猶及涅槃日自此闕山龕誰爲進佛骨

睡香菴詩

小引

菴爲孫伯觀供佛處中有花俗名瑞香伯觀按廬

山記以定今名名其菴自爲記

孫郎宅西江墅南卽取所植名其菴佛前一樹團如龕婆娑或得驕榎楠紫香撲鼻氣卽酣睡相具足忘餘貪太虛空空本無一何爲者花何爲佛花笑佛以常呵呵佛笑花以千頭多千頭多發衆香爲君參觀瑞不妨君今旣可瑞爲睡予亦爲君香作鄉日在此鄉安頓却世人空自醒而狂

鍊藥洲與鄭君熙醉題石上

僊翁鍊藥處荒草沒爲洲一點水心綠客眠如白鷗

今年太湖淺添却幾寸濶只恐麻姑來愁與人烟接

題楊妃春睡圖

暖風吹花花氣甜玉奴嬌寵春情厭厭罷飲睡不  
足夜漏每於花晝添宮娃只隔流蘇看誰敢輕輕拭  
紅汗意態盡歸圖畫中夢魂猶在君王畔

喜包彥平入山

遠渡故人情扁舟秋葉輕來從苕雪水又說闔閭城  
半日風雨對一屋波濤聲山卽在門外隔雲生暮晴

東有光端卿

湖上逢春客放舟客歸春共水悠悠故園花開不及  
見何處看花能不愁愁用愁風復愁別情人相念耳

應熱見說一春多費錢日日中酒花間眠

山齋乞竹

乞竹無論東西林一竿兩竿皆稱心但取醉時移不  
覺帶些疎雨刷苔衾

小臺上送張七之吳興

小臺起湖上平視皆山椒澤氣冒晴石寒聲生夏條  
坐頻危處徒心預別時搖一帶吳江水橋廻是碧荇  
細雨中坐金羽王茗白齋得逢字

山齋一如洗雨客來相逢簷花看自散雪乳坐能供  
未昏歸濕鳥先候響陰虫我亦有幽處啓牕明數峰

會君畿

花下送君去客中三見春忽驚新綠遠同是初歸人  
菱徑出履跡臨流澹衣塵還憑花下酒潦倒日相親

曉渡

人語沙中起曉光湖面開草帆風不飽緩緩看山來

惠山僧寄泉至

空明一甕泉來自梁溪船隔雨動秋響閉門生野烟  
可從白石供可結青松緣不問何人汲無非水月禪

送實父弟入燕

春風日送別春盡別未盡此別非他人他人別俱近  
迢迢幾千里城闕互相亘巍巍聖人治遠法堯與舜

洗耳飲牛徒翻然以思奮予志女所知女學予所遜  
從此兩分張努力自爲信

藤架

引藤聊作架樹空恰能遮亂影掃危石碎香吹白花  
酒眠重一幕村落過三家自許來幽約無妨晝雨斜

舟夜獨酌

吳江明月出照我烏程酒酒盡無處沽明月空在手

對竹吟

有引

凡夫山中產一竹岐尾雙秀若張公瑞麥然山中  
百歲翁未之見也聞宣和間有對竹亭亭卽此耶  
朱髯公過而竒之肖以筆墨傳世上予爲此君擊

節歌咏

雲傾山迸雷轟起新篁秀出如連理穉兒雙雙脫錦  
襦仙鳳翩翩搖翠尾翠尾搖風生夜香錦襦脫玉帶  
春霜欲同一醉龍鍾看五月十三來舉觴

飲石榭

聚石坦一席劇雲橫作梯樹頭漁罟濕花下釀房低  
杯竿竹香洗枕衾嵐翠携斜陽扶醉客徐下水樓西

金伯子過訪

別遠無書至傳言未可憑歸來卽相見枯寂果如僧  
但許留齋飯居然斬葛藤惠山方寄水手自爲君烹

竹山

山名大小竹石上生琅玕影翻雲日翠聲憂波濤寒  
除却五湖叟誰來尋釣竿

題朱季良湖上草堂圖

三四楹鷗畔起片片雲帆來屋底波添柳汁幾千斛  
山抹鬢煙拖燕尾朝懶沐夜不燭山光波光眼中綠  
我亦有廬湖一曲年年不見長新蒲憔悴征塵空羨

圖

杜鵑花

山花何自苦却以杜鵑名見卽春魂斷無煩月下聲

雨日

陽光不可掩，倏掩倏復開。一月自爲序，半山多蓄雷。  
晒帙收莫及，出門行且回。園丁相謂說，已過熟黃梅。

墻陰

築石斷樵路，遠泉惟暗通。青山十步內，白板半開東。  
枝厭怖夕鳥，雷留慙夏蟲。幽人便來住，不獨王君公。

思夫山

此山郎所住，嫁郎如嫁山。郎去山不移，結思湖水間。

松月堂初集

雲深闢此宇，一逕何其迂。樹木借隣有，賓朋曾到無。  
酒撲雨香細，人同山貌癯。尚勞培坎力，不及愚公愚。

懷公美朗倩

引望無方遠，勞思益夏長。况當插蒔畢，雨綠滿江鄉。  
戒受惟容酒，書來尚裹糧。裴生往還處，寧獨輞川莊。

送葉茂卿

五月江船少，榜人多寓農。蘆中自風雨，水面爭蛟龍。  
夜語向諸弟，客衣添幾重。遠殷來玉珮，川女或相逢。



短簷

霜茅自剪拂短短帶松垣炙背只在此隱情聊復敦  
雨斜燕壘濕花亞蝶衣翻樵牧乃吾友日西來扣門

見月

夜夜空山雨淙淙攪醉眠那知月無恙還復向人懸  
地白光欲凍火青陰獨然所思千里望惟恐不同天

雨後過孔先生不遇歸遇諸路班荆籬落各賦  
一詩

未及熟梅候陰晴互朝昏適值雨點歇來扣先生門  
應門語方出不遠人家村解衣向前路果得如所言  
斜日正相照班荆籬竹根

綠石山

湖上春水波洗出雲根老東風着意吹無隙生芳草

張山人碧螺峰社集雨中

簑雨綠蕭蕭山漁水復樵誰非不遠住會却待君招  
海樹忽開霽地雲如湧潮此中無夏日高咏酌天瓢

東村

曾聞東園公住此不復出年年開白花猶是漢初橘  
毛公壇

此公得道處山骨何其清草木日與習毛羽自然生  
不作子孫計因削版籍名世上多仙塚登壇空復情  
觀蔣

計戶各成區開塍直到湖桔槔旋老犍篋食禿童烏  
綠自歌邊起雨爲勞者蘇穰穰從此日饑可一年無

曲溪軒對雨追感舊游張伯子明父舅世中兄  
章夫表弟化卿

開軒出尊俎瀟瀟來相親高柳半天絮小桃何處津  
當時飲中伴盡結泉下鄰淒風愁雨對多病獨吟身  
雨後登虎峰惜別

對雨已覺暝雨殘仍遠躋濕氣出雲上斜光來竹西  
山分翠欲接鳥悅喧不棲花房一甕滿明日爲誰携  
姚珮卿過訪夜宿湖齋

雨際泊溪船青簑落照懸兩人相對語五月半晴天  
風竇通蘭氣山禽下竹煙夜濤喧酒後寒枕太湖眠  
聞舜五將歸志喜

喧鵲起簷際聞君將到家未爲相勞苦已失遠離嗟  
五月盡時雨一帆生處霞林陰人不覺開到海桐花  
陳文林志玄捐賓客之館予廬先人墓未敢束  
芻曾賦五言當哭令子文學復枉書乞挽詞以  
一絕遠荅來貺

一夜秋風客散門黃壚誰識孟嘗君江南江北迷荒  
草無處無人哭墓雲

烹雨

積陰仍閉戶所事若爲忙舉火澗泉上滌鑪簷溜傍  
芭蕉分却點梅子帶來香此味悠然得與誰同一嘗  
食楊梅憶郭二

入薦催盧橘論交可荔枝墨雲塗一色朱火鬱三時  
西子塢中好鄧尉山北遲空教水碗對轉渴故人思

孤年集  
一  
訖公病自越中歸寄訊

曲曲三溪路行行不可窮  
田方足秧水帆亦趁茗風  
病得歸來後閒生坐卧中  
松陰空丈室結夏與誰同

哭穉孫

十三年前返女魂天憐女父未有孫  
十三年後魂不返天何苦毒衰吾門竟不顧  
親老痛妻孀孤又存  
斬却詞源一派來崑崙  
自閉陶齋誰開茗園素帷塵流  
燈晝昏巷哭野哭波聲吞

越舟吟贈張七

越舟摇摇輕渡湖舟中人非越大夫  
藕花蓮色藕絲斷桃葉絕響桃根枯  
夕風吹動涼堪把明星歷歷河  
流寫不羨天孫許嫁牛却憐公子何須馬

七夕張七西齋會集得衣字

土屋茅墻碧四圍美人携處客如歸  
秋因月閨應難早夕到星期  
自不違枝露泣蟬聲未歇  
葉風翻鵲影全稀樓西片片流雲  
綵莫是天孫遣嫁衣

全齋衲公房對雨

一月飛炎煙生植半枯稿一雨四屋下自西溯于卯  
如煩沃金灑如病值金草况在東林西秋氣襲人早  
物我兩無言所得不爲少

聞東生病起寄懷

相尋常不見各以此心通有客來湖上知君是病中  
枕書過暇日閒逕已秋風明月今年好無能一酌同

溪南夜泊

秋晦舟中夜相看獨有燈隨綠聊寄宿寧道不如僧  
溪對橋雙影雲低水一層踈踈風柳外蟲響亂漁湖

潘昭度過訪山中不值

日日苦煩熱散髮松下卧偶乘雨涼出君亦乘涼過  
水雲浩漫漫邂逅不相覩雖日山中人曾以藺爲慕  
獨往勞心神神交且如故還聞走隣刹待我日將暮  
龍陣橫空來扁舟乃西渡

中秋後三日雨過凡夫俱不及宿

一年秋半後兩度客來時路熟不覺遠月明如有私  
微言松塵會塊石棘門支且住復辭去莫令吾輩知  
偶過城東隱居

墻藤絡晚瓜砌葉翳秋花人事城中滿窅然自一家  
青山來處雨白露降時茶窄逕才通客林西散早鴉  
東生茗園秋夕二首

二三十樹青梧桐葉脫未脫餘秋容客留一飲不得  
醒醒却忽來何處鐘

主人病骨何稜稜秋氣漸高衣不勝且眠且飲夜如  
許照雨照花同一燈

秋晚石湖作

豁然十數里一帆生雨西蘋花如欲語日暮不堪携  
漁戶偏新郭僧田帶越溪依依爲別處橋畔柳陰低  
風雨舟中同吳六夜話

小舟期趁月不道雨黃昏數數問前路家家多閉門  
神燈遙數點秋冷只孤村促膝飲相勞半生今夕言

郡回阻舟渡水菴懷端卿

半渡浮烟罄平蕪上露臺十年前此任八月閏初來  
舟撼山根泊樓凭水面開有懷僧不解只問郡中回

過愚公墓

滿城相送去隨復滿城還留此淚澆土陰陰平楚間  
春風乍吹綠秋葉又摧斑絕筆雖然在脩文恐未閒  
欲爲通雨夢今夜宿寒山

閏八月十五夜郡中看月寄懷東生凝父虎山

橋上

兩盈秋半月却似一宵看坐亦俱到曉覺於今更寒  
水城開進艇花靨醉披紈不及山樞燕白翻松露盤  
霜降後一日同八公曉渡湖上

水白烟荒荒坐中生曙光無地限四表有僧同一航  
蟹釣上風逆橋林吹渡香行行新鷹過猶帶夜來霜

吳門別周六

江滸悠悠路城西井井烟爲君三過夜還少一延眠

月出降霜後酒開新菊邊旅人醒不得帶夢上淮船

日暮

相去覺甚遠寥寥無一村欲尋投止處下馬登高原  
落日對面照行塵隨路昏過來人不見聽得同鄉言

王元直過宿白門客舍

菊花高一丈照影上屋梁留君花底宿被短覆衣裳  
夢去各鄉縣語來同感傷年年愁秋夜今夜幾何長



